

零都縣志

雩都縣志卷十

人物志

名臣

明

郭端

郭端字季正幼奇敏日誦數千言下筆能與古人抗衡永樂乙酉以貢入太學授行人司行人壬辰選御史巡按廣東時鎮守大璫雷春恣睢殺人莫敢忤總兵尚書以下皆俯首唯命端列其罪狀飛章劾之竟置於法靖江輔國將軍陰謀不法端以其事聞遂

雩都縣志

卷之十

人物名臣

一

伏辜文皇帝下詔褒之時雲南鹽法不清乃遣使馳召端回京欽諭協同大監某給事中張縉巡劾滇南鹽政既至剔清夙弊凡所措施皆井井有條貫畢事還朝適□□御史蔣得中迭擾閩廣湖湘間嚴旨緝之不獲廷共推□遂捕得之於延平上悅賜鈔賞勞時安南初定朝廷嘗有南顧憂欲簡才臣監軍并巡視兩廣交趾地方特旨簡端賜璽書督同總兵官挂征夷將軍印新城侯張輔西平侯沐晟豐城侯李彬雲陽伯陳旭統攝三軍屯營禦侮端連疏懇辭上不允欽諭之曰自太監總兵三司羣僚聽汝考劾端拜

命之後益勵厥職由是遍歷兩廣巡視交趾折豪強  
雪冤抑釋管福亮陳道謙熊朝政於樂平辨陳勉李  
旭之無罪外不避勢內不避嫌驄馬所至墨吏債帥  
莫不聞風膽落馬西平侯沐晟作詩頌之曰青驄馬  
肥霜蹏輕金環玉轡下神京長安道上看旌節監軍  
鐵面南征行威風凜兮號令明吐虹霓兮斬蛟鯨長  
驅直入交州城秋毫無犯歌太平魑魅伏鬼神甯功  
宗定海宇清二十四考中書令子孫世世終當承永  
樂十九年赴京考績以最進階奉議大夫僉山東按  
察司事歷三載昭皇帝在青宮聞端勞勩夙著乃簡

在廷以新官替回抵京適值洪熙改元之初召見便  
殿溫旨留用給牌隨侍未幾昭皇帝上賓丙午宣宗  
即位改交趾僉憲交夷叛服不常廷議欲罷兵明年  
丁未適黎利遣人送安南王三世孫陳暲表乞立為  
陳氏後上乃遣工部尚書羅汝敬齎詔冊封暲為安  
南王并勅班師將及境總兵成山侯王福太監山壽  
海島都督馬英連帥司馬戈謙憲使楊時習御史周  
岐後給事中郭永清暨端預出境迎使先期三日而  
後至汝敬以迎詔後期上狀通與端等皆逮繫端在  
獄九年讀書之外賦詩自樂至宣德十年始蒙恩宥

復原官端旣出乃得與妻子復聚於京邸旋得疾臨終家人問遺言端曰幽繫九年聖恩未報無以見文皇仁宗於地下言訖而卒旅櫬將南歸都憲陳勉撫棺大痛曰吾為國家惜老成非以哭其私也都御史孫曰良曰郭公以宏博之才卓絕之行立朝為名御史僉憲山東安南為名憲司旬宣茂績炳耀遐荒屈蠖九年功業未竟同時逮繫者後多以功名顯而公不幸死矣後吉水解縉過雩為匾兩道風霜於其門

### 袁慶祥

袁慶祥字德徵號崖松晚年自稱野翁父端順慶教

授慶祥生而穎異有大志博綜羣書文章渾雅博大有先秦西漢風字法遒勁性剛正深嫉逢媚心所否者雖權力不能奪成化戊子領鄉薦入太學歷事內府上書陳五事一曰省國費以節民用二曰嚴選舉以重守令三曰修武備以防邊患四曰存公道以守國法五曰起民望以惜才能稿成衆皆為慶祥危共諷止之不聽曰苟利國雖死不恤疏竟上憲宗御文華殿召通政司官逮慶祥至東華門待罪內官懷恩傳奉廷杖八十及半幾死值奉天門災復奉旨免疏竟留中次日宣吏部查例欲選邊方而銓宰意在保

全覆疏本生歷事未滿不應選用奏旨發回本監肄業祭酒周洪謨耿裕邱濬共書一葵貫日語旌之成化戊戌登進士第授直隸潛山知縣潛山人曰是嘗廷論刑部尚書董芳者也吾儕敢輕犯令公法耶咸相戒不敢為不法事訟息庭閒鳩巢廳事馴擾飛鳴士大夫作瑞鳩篇以紀其事時流寓妖僧演術惑衆公緝獲之立斃杖下中官馬某奉命往江浦恃權恣睚道經潛山慶祥不為禮從者鞭笞胥役怒及長官中官笑曰此縣官乃往日打不死袁秀才也歛威而去慶祥迎送止投一簡而已街婦夜績姑語媳曰寒

甚可斟瓶酒消之媳如言酌酒進姑曰酒甚清好似袁縣官夜卒聞之聲言於衆事傳京師南撫王恕特薦陞北刑主事慶祥在部廉明仁恕小大之獄咸求其情時有近倖坐法方畏推勘慶祥毅然成其獄大司寇何喬新侍郎彭韶驚服之廣西幽獄柴岳等一卷終年未定一訊決之卒甦岳等而加誣主罪叅及問官何喬新特疏旌異欽命總讞十三司刑獄事論及刑書則危疑交迫每以宋歐陽公典獄事比之在部四年奏最晋階承德郎會兩廣寇亂廷議推公鎮撫其地遂陞廣東按察司僉事奉勅提督廣湖南韶

等府兵備時後山賊首林大蒲劫殺官兵為地方患  
慶祥至申明賞罰訓練士卒部署將校久之曰可以  
用矣乃擐甲躍馬親督將士一戰而討平之明年斬  
增城賊吳永通等五十餘級降其黨五百餘人斬惠  
州賊首黎官愛等八百餘級撫散脅從者五千餘人  
潮陽童廣英僭稱亞王哨衆數千及羊叫石等十餘  
處俱次第撲滅高州大桂山賊衆踞險跳梁慶祥易  
服潛行察其嚮導伏精卒數處一鼓破之賊驚為神  
又慮後山白水為賊舊巢要徑乃調議從化馬田增  
城河源等處撥置規畫招集流移題建龍門新甯二

零都縣縣

卷之十

名臣

五

縣扼其喉吭捐俸改修英德程鄉興甯三縣學宮廣  
其教化遂今綠林奧窟化為鄒魯禮義之區白沙陳  
獻章大書嶺海澄清四字以賀御史熊達以望推慶  
祥進表廷論平寇開疆之績敬皇帝賜織金文綺二  
端宴光祿寺方膺顯擢有忌其剛直者將摭他事阻  
之慶祥慨然曰節鉞之榮何如舞綵之樂也遂以親  
老連疏乞休帶銜致仕毅皇帝登極追叙前勲部以  
慶祥功上遂得膺恩晉階朝列大夫正德己卯宸濠  
叛欲起義兵討逆因昔年廷杖股肉碎裂老復痛苦  
乃上王守仁進剿方略王多遵服之家居足跡不履

公府事二親孝敬無閒胞弟五人怡怡田廬間日與同里耆宿盤礴泉石寄情酒瓢詩筒間者三十年年八十一卒所著崖松集歸來稿讀史錄古今雜議藏於家羅洪先曰予嘗過雩耳袁公事甚悉因嘆曰浩然之氣上為日星下為河嶽貫萬古而不朽者也昔人慷慨一時淹沒後世氣餒故耳公初以孝廉扶持國是逆鱗抗疏幾殞身而弗恤繼秉節鉞清海宇肅嵐烟開闢疆土紓天子南顧憂急流勇退解組養親剛介之志金石不渝風節所垂百世具瞻眞盛世君子也

雩都縣志

卷之十

名臣

六

李涑

李涑字源浦號養愚自幼岳立家貧刻苦讀書屏跡羅巖屢月不至城下為文能自豎一家督府吳興陸公輒稱曰奇才奇才嘉靖丁卯舉於鄉辛未登進士授寶應令寶應故水鄉會大水田廬蕩析一望皆白涑自攜蔬糲循行阡陌間踐冰霜沐風雨衣敝面垢不顧墾闢疏濬不遺餘力民賴以生活涑父鈞至寶應視涑時涑所入俸盡市穀飼餒人囊無一金強市魴肉為供鈞曰兒為官日蔬食我今尚田父也乃肉食耶揮去之父子共薇蕨而食寶應人至今尚能言

之七年赴召老穉攀轅遮哭送至數百里貯水一罌獻之謂令公廉如水也久之乃建祠生祀焉丁丑拜戶科給事中江陵相不喪父而充大婚冊使因抗疏言禮重大婚為母儀天下宗社萬年計奈何令新喪斬焉輟哭將事乎易服則非情衷服則非禮且國家非有兵戎計謀欲借輔臣決策上左右豈乏一二足使者臣愚以為是可已此不可已將無所不已止之便疏入上遣司禮監馮寶傳諭元輔昨李涑說大婚禮不宜命先生供事這厮却不知出自聖母面諭朕先生盡忠盡不得孝重其事纔命上公元輔執事行

禮先生豈敢以臣下私情違悞朝廷大事次日奉旨朕面奉聖母慈諭大禮遣命元輔欲重其事豈敢有違李涑這厮乃敢借言離間欲阻成命好生欺肆且不究着該衙門知道時居正手疏目吏部曰諸狂童方逐何得留此狂奴難我吏部懼不能對會涑復上方言四方水旱歲不登不宜令上方將作鉤盾諸臣作淫巧以損上儉德廷臣迎元輔意遂出為山東僉事再遷廣西叅議居粵西四年嚼蘖飲水一如寶應提綱飭紀未始一日懈弛江陵敗進憲副飭蘇松四郡兵事諸役迎者至雩見敗廬數椽蟻垤近席飯疏衣

褐蕭然寒士歸語大原相公大原相公嘗津津稱述以勗居官者甫兩月聞封翁訃即日徒跣歸哀毀骨立既葬廬墓下免喪再補舊地歲飢奏記兩臺請蠲請賑灾眚俱蒙實惠又著經賦一書欺隱飛灑之弊盡為搜剔已超拜中丞撫江南十郡裁革供帳捐斥浮靡一意務在拊循而又以餉籍屬兵使者司出納秋毫無所與卽吳中兩政府在朝未嘗及門施一幣有司以豎枋請第曰歲不稔未遑也先後在吳五年所御一冠一衿一布被不更置郡邑亦無敢以一登豆薦者郭子章嘗言今天下稱清德者不乏而情貌

雩都縣志

卷之十

名臣

八

相副始終一致則惟李中丞一人以母老乞養奉旨予告既歸日愉愉奉母孺人懽月會邑中同志講明朱子德性問學之旨嘉惠後學文章原本性命雖談笑題咏皆闕理道癸巳起撫保定提督紫荆等關念太孺人春秋高力辭不就家居每食惟煮豆為下箸物帷敝不能更置糊紙補之庚子居太孺人喪四方來弔者至不能治蔬具麻衣籃縷朝夕不解遂抱痛致疾未及禫服而卒萬曆三十五年督學副使姜檄郡邑有司崇祀鄉賢所著奏議文集語錄藏於家

前志論曰李中丞德業在三吳兩淮至今兩地人

猶能言之在諫垣犯顏讜論甚多其尤難者止江陵充神宗大婚使一事蓋是時鄒吳諸公受重譴去臺省官無敢再言者公繼其後抗疏江陵甚怒目吏部有諸狂童皆逐何獨留此狂奴難我之語江陵蓋中丞辛未會試座主也嚴威之下不惜功名性命以犯其師非大賢而能之乎至若郭季正之巡按廣東劾鎮守太監雷春竟置於法靖藩所為多不法詭言京師有召密以其事聞於朝遂伏辜及奉璽書監勲帥張新城沐西平李豐城孫雲陽軍正當交夷叛服不常兩粵危疑之際外持風

采內握奇籌遂使遐方綏輯雖以文皇帝之神武攝下昭皇帝之精明繼照皆褒嘉眷注召見慰勞故九年之繫宣帝鑒其忠誠豈非功在三朝不二心之純臣歟宜其潞河白旄之日陳勉撫棺而慟曰吾為國家惜老成也袁慶祥讀書太學五事疏陳指切時弊逮杖幾死及成進士起家潛山能使中官畏其強項織婦頌其清廉及官刑曹總讞十三司用法平恕自大司寇以下凡大疑獄資決之備兵東粵所在峒寇猖獗躬擐甲冑親督將士次第蕩平方略奇秘號令嚴明雖古名將當不是過

題置龍門新甯二縣招集流移興學訓士詩曰翩  
彼飛鴉集於泮林雅曰文武吉甫萬邦為憲其庶  
幾歟嗚呼此數公者可不謂之社稷臣耶

仕績

宋

黃爰

黃爰字晦之博學能文十二歲嘗咏日以況志弱冠  
登甲科試雁門令因新法坐罪去有詩曰獻議條陳  
十五事輸錢歲減二千緡備員出宰當求瘼忤旨監  
司竟累身生平清介與臨江孔毅甫梅川孫介夫南  
豐曾子固厚善嘗著安邦論二十餘篇未竟有旨差  
充四川廉訪使復任朝散郎通判潮州

郭峻

郭峻字次山性洞達無城府事繼母以孝聞年十八  
試禮部熙甯三年始以策訪進士峻侃侃數千言得  
末科調南豐尉夏侯偁為令訟盈庭未決會提刑毛  
杭至偁懼峻曰無患趨具酒吾為君決之偁呼囚數  
十至庭下使各言狀峻徐指曰某有罪吏具案來某  
無罪當釋皆自伏偁起酌酒謝曰君神明天授龐士  
元流亞也杭與建昌軍張子方薦於朝授秘書省校

書郎令崇仁民喜相告曰此南豐尉也轉著作郎知南城時江西最苦鹽法苛急峻從容調濟不使病民民深德之會福州奏乞鑄印詔馳給之既至開匣失印移牒求之至南城峻曰此郵卒竊弄之耳使漁者即江津沒而取之果得衆大驚服其發奸摘伏類如此知洪州元積中提刑曾杭知建昌軍鄭琰彭汝礪朱彥博司門郎中葉充江淮置制使蔣之奇交薦其堪充大藩任使元豐中僉判樞密院事六年卒於官孫志康誌其墓峻之孫字仁淑累舉不第以行誼聞

### 郭杞

雩都縣志

卷之十

仕績

十一

郭杞字堯章峻曾孫隆興登進士第為翁源令縣闕尉寇犯境以書生易之杞笑曰書生不解殺賊虞允文不嘗采石破金人乎區區鼠輩何足污吾刃即挺劍躍馬督兵迎戰生擒其渠率而還提刑楊萬里奏薦改承事郎賜章服知南康縣有丞金大寶貪墨杞首發其奸除名後僉判陝州轉承議郎主管西外睦宗院以卒生平剛峭有智略家無餘資落落自足當時名士如樓鑰黃仁傑皆推許之尤為楊萬里所知云

### 鍾岳

鍾岳字堯俞登政和八年第岳每試文義淵博為大

學彙征齋長多讜論秦檜惡之出為郴州桂陽令任滿不赴調家居蕭然客至不能具飯鄰助之炊居無廬舍編草以蔽風雨而已樞密院編修唐稷嘗曰只今文行如此翁者絕少周必大兄弟俱從遊焉周後以丞相當國岳未嘗一牘通之

明

袁端

袁端字自中遜志苦學行義高古景泰庚午中江西鄉試歷程鄉永興二學教諭陞順慶府教授初端署永興教諭時奉勅合撰修郴州實錄寓京師上書條

零都縣志

卷之十

仕績

十二

十事一曰隆聖學以端天下之本二曰開言路以決天下之弊三曰正士習以清天下之俗四曰謹官常以善天下之治□□策賢良以任天下之事六曰去貪暴以□□下之民七曰修武備以防天下之變八曰久任使以成天下之化九曰節財用以濟天下之乏十曰嚴保舉以收天下之才疏入憲宗嘉納之奉旨該禮部着擬覆奏刑部侍郎何喬新手札與端曰疏內條議俱中肯綮詞雖約而意已盡置之座右亦可以資聖德尋以母老乞休督學使石淮列端行誼上之都御史張瓚遣官以禮慰留之任滿當陞秩以

養母告歸既歸孝養備至居喪毀瘠踰禮郭祐嘗曰  
袁公正學懿行我輩弗如所著詩文不為奇崛雕琢  
語而溫厚正大殊類其為人有適軒集藏於家子名  
慶祥

### 嚴鈿

嚴鈿字文器鶚裔孫宏治己酉以易領鄉薦授杭州  
府推官辨冤獄清鹽弊剔奸胥民甚德之三載考績  
行筭蕭然時武宗在位權璫柄政通賄輒得美官或  
勸稱貸以行鈿曰行賄非吾志也且有貸必償常俸  
幾何非取諸民不能辦與其損民以利吾官盍去官

## 雩都縣志

### 卷之十

仕績

十三

以無損吾民乎當道賢而交薦之轉太僕寺丞奏減  
山東馬匹十之二三芻牧之困稍蘇尋陞廣西平樂  
知府在任六月風節凜然旋以病謝歸藜羹布衣蕭  
淡如寒士人無智愚咸曰嚴公古之廉吏也沒後提  
學蔡克廉扁其門曰清白吏

### 易世璧

易世璧字崑良應崇禎改元恩選貢生上北雍歷滿  
考縣丞丙子除溧陽後陞碭山知縣時徐豫數千里  
無地不寇無地不兵無地不荒朝廷嚴勅重臣督催  
飛輓入秋七月淮洪杳然御史吳邦臣以悞漕馳奏

上怒遣錦衣逮送西曹罪將不測漕撫史可法隨疏  
申救世璧從獄中上疏自明科臣亦疏其守禦惟勤  
勸輸如額過既可原勞尤足錄急宜昭雪還其初服  
奉旨復職比還丁內艱遂扶櫬歸里築室東皋濬池  
種樹桔槔躬耕每日夕一卷蠅書手錄與人論學無  
倦若忘其老至焉生平遇事擔當慷慨敢言與人推  
誠真摯誠直諒君子其大節尤炳炳也

### 黃褒

黃褒字崑山西一坊人宏綱子讀父書精心密意務  
探本原嘉靖三十八年貢令興安建設義倉歲荒獲

## 雩都縣志

### 卷之十

仕績

十四

濟民甚德之奉委監督永保土兵征懷遠逆獍有功  
特賜白金二錠陞柳州通判致仕歸與修嘉靖丙申  
縣志凡辨論皆出其手措語有關風教

### 郭祐

郭祐字崇德東二坊人景泰元年貢祐八歲就外傅  
授以古詩孝經隨口成誦為邑庠生以奇童稱入太  
學謁選天曹條陳潤色太平十二策未幾授廣東鹽  
課司提舉適朝覲陳救荒八事因孔子有六爻三極  
之說乃作三極圖解在任積勞成疾遂謝事歸及卒  
邑人惜之

宋邦柱

宋邦柱字如容號直甫賴村人萬曆乙卯歲貢邦柱生而穎敏年十四補諸生時稱神童旋餼於庠屢應鄉試四中副榜不遇嘗從中丞李涑游講求實學躬修篤行吉水鄒元標講學白鷺邦柱復遊其門鄒公以大成期之後選涿州州判時東事搶攘羽檄交馳邦柱應以謹敏案無留牘御史左光斗議開京東屯田屬邦柱任之捐俸闢田數百頃為諸屬倡左公喜曰使人盡如君天下事尚可為也遂具疏特薦有清操一塵不染長才四應咸周之語尋攝房山篆大璫

零都縣志

卷之十

仕績

十五

與成國構訟株連無辜時璫勢方熾邦柱不肯左右袒為持平釋論死者三人旋以憂去民皆攀轅泣送服闋補深州州判擢興濟知縣詣京師路遇鄒公應召為下車執手同行十餘里語及時事輒為流涕鄒公慰之曰君當自愛為天下用未幾卒於官

宋應奎

宋應奎字五東賴村人隆慶丁卯歲貢任上虞訓導新興教諭本躬廸士振興古學為文浩博淵微士林推服受其教者多知名陞博羅知縣以儒術飾治有惠政

邱祥

邱祥東二坊人成化元年貢任陽春知縣縣介山海蠻夷時擾祥至撫摩瘡痍修築城池民賴以安木蘭黃賊洞宿為益穴副使陶某獲其渠魁將殺之祥從容請姑令改過以安餘衆陶忻然從之得不殺後果不反以賢更四會縣其俗健訟有以斷腸草誣人者祥痛懲之奸風遂息

何進隆

何進隆泰之子選貢授湖廣蘄州判官改鄭州以治河工薦陞梁山知縣隆家故饒官轍所至皆攜貲自

粵都縣志

卷之十

仕績

十六

給遇貧民無聊者多周之以是清介之譽滿縉紳間若平徭賦賑饑荒惠政周洽一夕被病卒梁之士民為十哀詞哭之若失怙恃云

國朝

管樂

管樂字亮揆號立園西一坊人生有夙慧十歲能文十五補諸生二十三中乾隆丙辰科舉人壬戌成進士由湖南醴陵縣令起家擢至黃州府知府所至有政聲初令醴陵歲收漕三千餘石吏多浮取百姓苦之樂親監視輸米者悉裹餘糧歸欣然曰此侯賜也

吾曹有贏餘矣調綏甯民猺雜處舊有耙冲銅礦前  
官屢欲開採樂不可以為洗礦銹水必損田畝且洞  
口開山腹虛不能興雲雨均為民患乃請封禁上官  
違之遂寢其事署茶陵地瘠民貧歲歉仰食常平倉  
穀時應碾米三千石遠輸江淮賑濟樂再三請免乃  
罷守黃州嚴立保甲設簿呈驗記功過行賞罰各屬  
奉行無不效遇讞決輒輾轉以求其生嘗曰吾惟使  
死者與我必兩無憾而後安也歷官十餘年僅決大  
辟二人刻有三留勸本謂息訟留財忍氣留命大量  
留福諄諄曉諭民風丕變離任之日遮道攀轅不忍

零都縣志

卷之十

仕績

十七

其去督撫屢以操守廉潔才情練達列薦剡推為治  
行第一奉

旨軍機處記名兩為湖南鄉試同考官獲雋者皆名宿多  
與館選樂為文章天才發越刻有考信編卧村制藝  
稿漢江課士錄行世葉太史選豫章四子文樂其一  
也

康緒

康緒字特觀水頭里人幼聰穎篤志力學中乾隆丙  
辰科鄉試第五名乙丑會試錄明通榜選南康縣教  
諭每月課士於明倫堂欵以酒食誨之不倦勸修文

廟經理聿新以艱歸服闋補永甯訓導課士如在南  
康越二年截取知縣選山西孟縣地當孔道輶使往  
來車馬器具取辦於民必厚給其貲而民不擾孟有  
小河夏秋間洪水迅漲廬舍蕩析緒捐俸築堤水不  
為患每斷獄苟有生路可求即援例出之例不得未  
減求之再三乃已訟案隨勘隨結不妨民業逢嚴冬  
設粥廠製棉衣以濟窮民士民大悅泐碑以紀其德  
告病歸缺於資斧衆醵金贈之

宋昌恂

宋昌恂字懷恭號敬亭啟傳子應桂孫賴村人少好

學博聞強記淹貫經史刻有敬亭文稿行世中乾隆  
庚午科舉人挑選知縣分發雲南以親老告近改發  
湖南歷署石門新甯借補武岡州州同丁外艱歸服  
闋仍赴雲南歷署南甯縣霑益州臨安同知昌恂所  
至循分盡職夜治官書往往達旦不寐民有為前官  
所抑久羈禁獄者訊明立出之或有疑獄人不能決  
昌恂一鞠而出署甯遠時有僧被竊獲盜數人無從  
得贓偶過山麓見一新墳曰此即贓也馳視開墳贓  
果在是立還僧民驚為神署霑益宿多陋規悉革去  
太守巴公憐其清苦欲以鹽觔二十萬假之發賣可

獲息千金昌恂力辭之謂此頗類青苗法巴公不悅  
昌恂曰阿上官以取民財吾不為也比憂歸士民遮  
道如失慈父母作歌頌之以為有古循吏風云

宋昌琚 子泰附

宋昌琚字韻泉號几山一號松潭賴村人少英異為  
文超邁與族人昌悅華國諸子聯文會羣推畏友年  
二十沉潛易學獨具會心刻有松潭易說几山制藝  
几山詩稿行世年二十五中乙酉科舉人明年成進  
士謁選得雲南河西縣令民刁悍積案多至數十年  
昌琚悉清之夷匪叛擒獲百餘人檻送梟示以績陞

零都縣志

卷之十

仕績

十九

雲州知州督辦耿馬習宜廠年餘題署開化府旋丁  
父憂服闋因母老告養家居數年母艱起復選陝西  
葭州知州調署漢陰臨漳寶雞知縣華州乾州知州  
所至杜苞苴懲奸役平讞獄民感其德咸以衣傘匾  
額進昌琚却而不受曰吾願爾曹守法足矣奚事此  
為也嘉慶丙辰教匪猖獗蔓延川楚撫軍秦公承恩  
經略侯額公登保委辦軍需昌琚參議帷幄多方籌  
備匪聚散無常昌琚素精壬式占嚮如神又隨參贊  
侯德公楞泰生擒逆首高經德馬世龍等匪衆圍漢  
蔭廳城民情洶洶昌琚率守弁協力拒守追逐數百

里生獲數十人匪勢遂潰民賴以安後恒同其子泰率鄉勇隨提督王公文雄進剿屢得勝仗擒逆首先後十餘年以軍事旁午食息靡甯泊奏凱鬚眉盡白經略額公倚為左右手歎曰關中州縣惟宋牧可獨當一面也乃與勒公秦公並以軍功奏聞奉

旨宋昌琤率領鄉勇堵禦有功着以同知直隸州知州用加知府銜歷署興安漢中鳳翔知府題補直隸商州知州卒於官子泰以軍功補授四川青堤場鹽大使歷署大竹中江汶川知縣

嚴長宦

粵都縣志

卷之十

仕績

二十

嚴長宦字榮紳號澹園東鄉桃枝人嘉慶癸酉拔貢丙子舉於鄉道光壬午成進士分發廣東歷署豐順惠來等縣實授廣東開建知縣所至皆有政績以艱歸服闋選陝甘秦安知縣歷署山丹皋蘭等縣在任振興文教績著勤勞陞補洮州同知時有黑座寺僧匪滋擾地方奉陝甘總督林公則徐劄委捕剿宦乃設計剪匪滅巢與民除害洮州人立生祠祀之勒石立傳事聞大記卓異歷署秦州慶陽平涼等府後陞廣西潯州知府因粵匪梗道致未任而卒

忠勇

唐

馮祥興

馮祥興邑之象湖鎮人多智略與二弟皆武勇尚節義廣明間黃巢陷長安傾貲募兵勤王二弟歿於陣祥興累功為將軍詔遣歸圖盧光稠及境光稠陰遣人刺殺之投屍羅溪江驚濤怒激隨波飛揚數月遺骸始露沙渚鬚髯怒張生氣凜然人神之葬溪南立廟祀之

按祥興生於唐是時瑞金尚屬雩都為象湖鎮至五雩都縣志

卷之十

忠勇

二十一

代始析為瑞金省志附雩新舊郡志或以為甯或以為瑞總之祥興生時固雩人耳

宋

錢卓

錢卓字元立坎田人紹興初以土豪從軍閩中劇寇何白旗滿山紅范汝為等聚衆至二三萬人時陳敏為主將卓為部將相與討平之三十二年充御前神勁右將軍統領值番元帥五斤率衆五十萬圍海州卓選精銳與賊鏖戰擄殺於河套隆興元年五斤再犯海州城北及新橋卓領三千騎迎敵又戰勝之乾

道元年改武鋒軍統制番賊分遣馬步軍三十餘萬并女真硬甲軍十餘萬攻西門卓連戰大勝女真知州海有備不敢犯二年朝廷以海泗唐鄧與虜連和卓權發遣高郵軍仍舊武鋒軍統制三年步帥陳敏知高郵以私嫌劾卓遂移建康丞相虞允文自四川赴召薦於上授武經大夫六年有旨招萬弩手付建康交管特添差兩浙路分七年復武德大夫除江西路鈐吉州駐劄會孝宗銳志恢復兩淮置制王之望辟奏改除淮南路鈐駐揚州召對稱旨孝宗謂近臣曰錢卓在外耐勞竭力明日謂丞相葉衡曰江西錢卓

朕欲近用之何如衡不對奏江西茶寇未平且令卓收捕後日用之未晚仍除江西路鈐帶節制軍馬初衡知太平州日以酒三千瓶付高郵市與軍士卓性剛直不受以此不得近職卓到湖南茶寇已為提刑辛棄疾所擒王宣子帥湖南峒寇蟻結辟卓湖南路鈐潭州駐劄宣子器重之宣子赴召辛棄疾繼之無日不與握手議峒寇朱少三破桂陽縣卓捕之提刑詹儀之爭功互奏辛不願理賞卓功亦泯未幾除江西總管駐劄隆興府淳熙十二年朝廷錄諸將奇功海州與焉特與添差江西副總管吉州駐劄明年卒

於官年六十六卓之忠勇出於天性趙丞相雄徽猷閣直學士周操御史謝諤俱交奏其堪任將帥惜時無授之者不得盡其用云

宋志贊曰錢元立起戎伍乃與謝良齋辛稼軒司馬太監諸公相與俎豆豈直行伍之材余嘗訪其子孫問當時討賊事聽之毛髮灑淅眞英雄人也

### 陳瑀

陳瑀北鄉竹溪人人呼三官性剛直尚節義以智勇自命時劇寇彭友擁衆作亂虔江上下騷動岳武穆奉命來征師至贛三官單騎走虔嶺詣軍門大呼求

## 雩都縣志

### 卷之十

忠勇

二十三

見指陳賊勢虛實掀髯縱談侃侃皆中機宜武穆壯之卒依其言遂斬彭友於雩都餘黨退保固石三官復指畫山谷形勢武穆命提戈前導深入賊壘盡降其衆所得於敵悉以賞賚於是三官之名傳誦岳家軍中未幾卒能為神族人廟祀之每風雨之夕輒聞劍槊介馬聲景炎間丞相文天祥駐軍雩都聞陳氏父老談說三官遺事慨然曰使山澤豪傑皆如陳家子天下大勢何遽至此遂為之紀其事於石

明

### 李復原

李復原字伯已號淵源幼失怙恃托養姑夫陳彥士家應試歷官俱氏陳後改歸本姓不忘所自也洪武二十八年由邑庠貢入大學任廣西平南主簿陞本邑丞值猺寇掠鄉廂復原帥兵迎敵於縣東北蛇黃岡揮刀躍馬突入賊陣連砍賊首血涔涔滴賊皆披靡後中毒矢斃邑二勇士馳禦赴救死焉城中憤甚鼓噪出戰賊敗走獲其屍面色如生邑人士咸泣明景泰初立廟祀之以二勇士配惜遺其名雍正六年奉

旨入祀本縣忠義孝弟祠

零都縣志

卷之十

忠勇

二十四

李蕙春

李蕙春邑諸生青年能文多智畧善騎射以氣節自許崇禎末粵賊閩羅總統衆數萬寇贛蕙春於渭田團練鄉勇為固圉計甲申十月賊至馬嶺唐村蕙春率衆禦之賊分隊合圍蕙春揮刀突入賊陣斬紅白旗總二人賊稍却既而復悉衆來攻我兵僅二百餘人蕙春率之赴戰以衆寡不敵歿於陣中丞林公一柱大叅于公鉉檄縣祠祀之

國朝

邱蒸

邱蒸字聖與少孤力學事母篤孝為邑名諸生性倜儻有膽識工騎射會康熙十三年三藩之變閩楚流寇擾虔南遂募鄉義勇保護邑城旋謁總兵哲爾肯陳時事機宜悉合鎮府奇之劄委從副將許公盛平南安復潭舖乘捷歸勦邑之固院賊斬級三百餘邑中藉以無患十六年春閩逆自汀出陷會昌瑞金蒸招撫偽總兵楊夢月等遂復二邑冬敗韓陳諸逆於甯都之黃陂都府及鷓鴣寨老虎嶺等處斬級數千賊黨盡滅興邑崖石賊負固六載蒸獻謀主帥出奇兵絕其乾田餉道火其南寨賊首朱明窘懼十八年

雩都縣志

卷之十

忠勇

二十五

七月率黨五萬六千三百餘人投轅薙髮當事上其績部議叙文武堅貞等事奉

旨劄授守備署都司僉書加授遊擊銜以次銓用時有勸之應銓者蒸曰余得保鄉里無虞朝夕奉老母歡飲酒賦詩食太平福足矣

張鵬舉

張鵬舉南鄉畚嶺人 恩貢生家頗饒為人慷慨仗義性剛直咸豐三年粵匪竄擾江境贛南道周公玉衡札飭各州縣鄉村團練鄉勇協助官軍防勦鵬舉奉諭發粟訓練壯勇四百名誓與賊不兩立六七年

粵逆犯境信安二縣土匪蠡起滋蔓牛嶺馬嶺小盆等處鵬舉即帶勇進剿前後數十戰賊皆潰七年三月二十日信豐踞逆擁衆十餘萬來撲畚嶺鵬舉率團勇在均竹隘口堵勦親自引火放炮血戰半日大呼陷陣我勇寡不敵衆遂力竭陣亡屍身碎裂僅得首領歸葬奉

旨祀昭忠祠世襲雲騎尉

蕭斐

蕭斐字卜臣號燮堂西一坊人僑居南鄉盧坊性聰穎沉潛異常英年食餼道光己酉拔貢咸豐三年奉

粵都縣志

卷之十

忠勇

二十六

諭團練集族鄰諄諄誥誡曉以同仇大義六年四月吉安股匪陷城會同各鄉團勇賊被擊走倡率邑紳請前任潘公統領鄉團進城招撫設局籌餉旋即隨往各鄉捕勦聿著勤勞擬保以教諭歸部即選七年冬髮逆突至又督帶城鄉團勇數百名親往黃岡堵禦力戰不克乃曰事急矣城誰與守於是帶勇入城夙夜登陴禦勦旬餘城陷鬪志彌堅猶率勇血戰大呼殺賊力竭捐軀勇皆戰死事聞於上奉

旨恩卹賞給祭葬銀兩廕一子入監期滿以縣主簿選用  
附祀邑昭忠祠

王允祥

王允祥字瑞堂號慶庵北鄉車頭人青年食餼知大義尚氣節咸豐六年丙辰團練鄉勇隨官軍勦土匪有功邑侯潘公毓瑞擬保以訓導選用七年冬逆匪撲城帶勇百餘名入城捍禦城陷猶率勇巷戰殺賊數十人力竭陣亡附祀邑昭忠祠潘公以千載如生區贈之

朱戴梯

朱戴梯西鄉羅江人少刻苦奮志芸牕弱冠補弟子員旋食餼讀書見古人忠義事輒把卷歛歔以為儒生當如是咸豐六年土匪竊發奉諭團練隨官軍防

零都縣志

卷之十

忠勇

二十七

勦屢立戰功邑侯潘公毓瑞擬保以訓導選用七年冬髮逆攻城督帶子姪及烏坑團勇百餘名冒圍進城捍禦城陷率勇巷戰遂亡於陣勇皆覆歿附祀邑昭忠祠

蕭勝

蕭勝軍功保舉六品銜拔補把總北鄉銅鑼墟人咸豐六年賊陷縣城帶勇隨同官軍克復進勦安信二邑股匪屢立戰功七年帶勇克復甯都州城時南豐失守奉調往勦克復旋數日髮逆大股復至四面圍撲勝率勇奮力血戰城下力竭捐軀全軍覆沒祀昭忠祠

謝德榮

謝德榮字茂華武生北鄉燕子窩人素有胆略善騎射咸豐七年十二月初五日賊撲縣城榮帶勇二百名赴援行至高公祠遇賊接戰賊衆四面圍困榮奮勇衝突拔劍砍賊馬足死戰陣亡附祀邑昭忠祠

李朝侃

李朝侃字若陶城內人少穎異尚節義屢躋名場乃援例授州同銜家素封咸豐七年丁巳冬髮逆圍城與姪布理問銜廷珍監生廷琳自備口糧招集大禾溪等處本族壯丁百名入城保禦城陷叔姪奮勇殺

零都縣志

卷之十

忠勇

二十八

賊力竭陣亡勇皆戰死賊退其子姪猶發數百金賑卹難裔叔姪俱附祀邑昭忠祠

周育萬

周育萬邑廩生白口人咸豐七年十二月帶勇百餘者入城捍禦城陷率勇卷戰數時力竭被執篤賊不屈而死附祀昭忠祠

廖勛

廖勛附生南鄉盧坊人咸豐七年十二月帶勇入城為保禦計誓以死守不遑寢食城陷率勇死戰殺賊多名力竭而亡附祀昭忠祠

郭鳳翔

郭鳳翔監生黎村人咸豐七年夏帶勇百餘名入城保衛在局辦理軍務十二月髮逆陷城不屈而死附祀昭忠祠

李炳星

李炳星字位台邑庠生城內人咸豐七年冬聞賊將至即發粟募勇為保禦計長子監生朝宰竭力勦辦城陷被傷猶大呼朝宰殺賊賊怒父子皆遇害附祀昭忠祠

李貺賓

雩都縣志

卷之十

忠勇

二十九

李貺賓字笙奏邑庠生城內人咸豐六年奉憲團練田勇七年冬髮逆圍城親督勇捍禦誓與賊不兩立城陷率勇死戰力竭捐軀附祀昭忠祠

李起衿

李起衿字貴青武生城內人素性果敢善騎射咸豐七年在局勦辦軍務兼管團勇賊攻城急謂同事曰事急矣諸君宜努力吾等生死共之城陷奮勇巷戰身被重傷遂歿於陣附祀昭忠祠

劉經桂

劉經桂字顯勝監生居城內西一坊程屋領汲井之

旁素性質直勤儉克家咸豐丁巳十二月逆匪攻城率三子登陴捍禦朝夕不懈越數日賊勢愈熾屬其子曰脫不虞吾必不蹈賊刃爾等宜努力殺賊遂將家中貨財舁聚廳事四面積薪圍繞十三日城陷桂即歸家閉戶自焚人屋俱成灰燼三子與賊力戰而死今過其地者猶為之低徊太息曰此劉君死節處也父子皆附祀昭忠祠

周先惠

周先惠曲洋小溷人咸豐三年帶團勇追剿黃蠟梨黨匪有功觀察周公玉衡獎以軍功六品七年四月

雩都縣志

卷之十

忠勇

三十

初八日粵逆竄擾鯉汾等處惠帶團勇數百直抵汾坑與賊截戰失利退回泥灣堵剿奮勇大戰殺賊數十名賊稍却復遶僻徑前後夾攻勇被衝散大呼陷陣而死附祀邑昭忠祠

朱敬先

朱敬先軍功六品安遠縣人僑居雩都北郊咸豐七年十二月髮逆圍城奉調督勇守禦五門朝夕不疲十三日城破率勇巷戰陣亡祀昭忠祠

張標

張標軍功六品小溪丹村人咸豐六年堵剿信安賊

匪屢立戰功七年十二月初一日帶勇百名火藥百餘斤由南門冒圍殺賊數名衝鋒入城十三日賊轟破小西門城牆標率勇堵口截戰殺賊無數各勇腹枵力不能支標持刃獨戰身被數十鎗而死勇皆覆沒附祀邑昭忠祠

蕭 琿

蕭琿字韞山號琢人 恩貢生西一坊人性穎敏力學沉潛經史生平克盡孝友操守清潔數十年足不履公庭讀書外毫無所嗜咸豐七年冬髮逆撲城奉諭督勇堵禦西門朝夕不懈城陷之日猶率勇巷戰力竭捐軀次子麟兒同時殉難禮曰臨財毋苟得臨難毋苟免君其有焉附祀邑昭忠祠

理學

明

何廷仁

何廷仁初名秦字性之別號善山魁形長髯廣目豐準遇人無少長謙冲煦濡語必盡情王公守仁節鎮虔臺四方學者多歸之廷仁曰吾恨不及白沙之門陽明子今之白沙也遂裹糧入郡會守仁出征桶岡廷仁悵然曰我不能于于而居徐徐而俟也追至南康拜之時廷仁有繼母之喪斬然以禮自持守仁見之數曰是可謂不學以言而學以躬也既聞萬物一

雩都縣志

卷之十

理學

三十二

體之論致良知之說遂豁然有悟不務外馳專求心性刻志磨礪務底大成尤善於誘掖篤於切磋海內同志來謁陽明子者咸樂親之守仁在南浦則左右於南浦在越則左右於越時海甯董蘿石年六十八以杖肩其瓢笠詩卷訪陽明子於會稽山中與之語如寐得醒退謂廷仁曰吾非至王夫子之門幾虛過此生吾將北面夫子得母老而有所不可乎廷仁起拜賀曰先生之年則老矣先生之志何壯哉入以語於陽明子而納拜焉蘿石之能勇廷仁之善誘越中一時競誦云嘗語同志曰學問之道須從起端發念

處察識於此有得思過半矣又曰知過即是良知改過即是本體又曰學務無情斷滅天性學務有情緣情起釁不識本心二者皆病又曰執有無而論莫若兩忘只聽良知是非善惡莫能自欺有情無情自無不如知至至之更無可知聞者咸以為確論也廷仁以諸生追隨守仁一不以舉子業為念嘉靖壬午始舉於鄉上春官不第辛丑授新會知縣喜曰今幸仕白沙之鄉矣數十年夢寐今始及門至則掃祠宇舉釋菜日進諸生講學祠中始之以靜坐之方申之以無欲之訓久之環祠門而聽者踵相接也居新會五

載不事法令專務德化民皆翕然趨於禮義而恥為不肖曰吾恐無以見何公也視邑之要害曰松柏堡曰臨江臺請樹兵防衛寇患遂息隨鄉而置社學因地而立訓規由是窮山荒谷皆斌斌有禮讓之風復全節大忠二祠於崖門創義塚以祀勤王死義之士凡所設施皆關風教以最遷南京工部主事分司儀真權蕪湖市價稱平商旅兩便去任之後三地父老樹碑以記德政復貌生像祀焉滿考獲恩覃封遂投牒吏部乞致仕既歸日與同人商確學問此外更無餘事年六十六卒卒之日稱貸襄事吉水鄒公元標

曰心性既無形聲何從而得既無足體何從而守知無所得即有所悟知無定守即有定主矣彼兢兢欲捕風捉影者聞其言可以醒矣先生又曰本體固無聲臭然不可認定一認定未免為聲臭所染彼詹詹欲耽空守寂者聞其言又可以思矣惜生也晚不得侍先生以竟緒論焉卒之三年督學鄭公璜溪檄有司列於鄉賢七年督學王公敬所合歐陽德同配饗於郡城之陽明祠著有善山集行世入明史儒林

### 黃宏綱

黃宏綱字正之學者稱為洛村先生舉正德丙子鄉

試第七人自幼志趨邁越甫讀書便能通會大意既長就鄉塾教以舉業文字宏綱曰雕蟲小技吾儒之學須以聖賢為歸耳於是苦心刻索必務追其微茫而探其元始久之曰聖賢千言萬語大要不越主敬二字故居恒一言一動必範於禮雖在燕居如對君師焉正德丁丑王公守仁講學虔臺宏綱歸自計偕往謁而執贄焉甫三日忽悟心理合一之旨益信聖人可學而至凡所開導無不神解一時同學咸推讓以為不可及正德十四年六月宸濠變起守仁倉卒整旅宏綱左右行間凡張疑設間必相與密謀之喜

靖七年戊子守仁卒於南安宏綱扶輿櫬至弋陽適王畿錢德洪迎喪上巖瀨遂同歸越倣築場義經紀其家先是守仁卒有嫉忌其功高者譖於朝革錫典世爵有司默承風旨媒孽其家嫡子正億時方三齡與繼子正憲離化竄逐宏綱以身周旋多方調護得無恙後方相國獻夫以王臣為浙江僉事分巡浙東於是奸黨稍阻時黃綰適陞南京禮部侍郎宏綱特詣金陵會綰為正億請婚綰曰吾有弱息願妻之但老母在家必得命乃可宏綱乃偕德洪王畿走台請命而納聘焉宏綱居越三年以禮自衛內外大小咸

相信服越中學者莫不以為可宗也嘉靖甲辰授汀州府推官明罰勅法一無所徇尋入為刑部主事以直道忤冢宰遂拂衣歸每歲放舟青原與聶豹鄒守益羅洪先諸君子尋繹師學辨析毫釐新建之傳乃獨歸宏綱矣故當時陽明之門夙有評曰江有何黃浙有錢王謂宏綱與廷仁也綱性簡嚴未嘗假人色笑有所請質者瞪視注聽俟衆論既畢徐擇一二言諷之不競談以炫所知意態含蓄未易涯涘羅洪先曰正之持守甚堅言動必與心協而後發不致纖毫之力一以自然為主倉猝不撼可以鎮躁心瑣屑不

入可以消鄙見蓋望而知為有道不待其言之出也  
卒後配祀陽明祠又合祀於濂溪祠所著有洛村集  
行世明史與何廷仁同傳

### 袁慶麟

袁慶麟字德彰晚號雩峰初為謝生矻矻攻舉子業  
幾忘寢食已而忽自悔悟盡棄舊習銳志聖賢之學  
久之渙然有省曰吾性自足何事外求耶既膺鄉貢  
以親老遂不仕督學邵寶聘主白鹿洞郡守吳珪聘  
設教郡學為各邑諸生師俱辭不就正德戊寅攜所  
著藹蕘餘論謁陽明子陽明見而稱服曰是從靜悟  
庶幾焉中道而沒蓋斯文之不弔也

### 何春

何春字元之廷仁兄宏治甲子舉人自幼意嶽嶽不  
肯效今人嘗曰世無周程諸君子吾不當在弟子之  
列及王公守仁講學虔南春謂弟廷仁曰此孔孟嫡  
派也吾輩當北面矣乃偕弟師事焉苦心研究寢食  
幾忘久之渙然有省曰心體自靜須冥默存養靜無  
不動就隨動處省察幾善與即順順充養將去若過

為拘檢反成動氣幾惡與即發奮克治若因循放過  
便為喪志喪志是忘動氣是正助誠時時刻刻念念  
為善去惡即孟子有事集義勿正勿忘勿助長也更  
有甚閒情挂牽着外事陽明子語及門曰何元之工  
夫真所謂近裏着己也一日問於陽明子曰心有動  
靜道無閒於動靜故周子謂動而無靜靜而無動為  
物謂動而無動靜而無靜為神也且夫不睹不聞靜  
也起念戒懼則不可謂之靜隱見微顯動也極深研  
幾而心不放則不可謂之動故邵子曰一動一靜之  
間天地人之至妙至妙者與以此觀之人者天地之

心性情者天地之動靜也渾合無閒君子可以時以  
地而分用其功乎分用其功分用其心矣天理閒斷  
人欲錯雜精一之學恐不如此陽明子亟肯曰得之  
矣得之矣春嘗闢觀善巖日與同志談學時寄興於  
烟雲水月之間有舞雩詠歸之風焉初令漳州詔安  
改直隸含山未幾以憂歸服闋改霍山所至不事法  
令專務德教每月之朔望集諸生明倫堂講明人心  
道心之旨三綱八目之微聽者咸有醒發云未幾卒  
於宦邸霍人哀之如失父師焉屏岡歐子曰元之歷  
官三郡能使其民如廉恥自重雖僻塢寒墟皆置社

學雍雍絃誦之聲震動山谷真學道愛人之君子也  
無媿陽明弟子矣著有忖言集藏於家

### 管登

管登字宏升義泉其別號也嘉靖壬午舉人幼端謹  
言動如老成人弱冠讀中庸尊德性章憬然曰人性  
本高明一為物欲所汨其卑闇也誰咎於是以致知  
為學問關鍵亶亶忘倦聞陽明先生論學虔中登語  
何廷仁黃宏綱曰昔伊洛淵源實肇此地今日聖道  
絕續之關其在斯乎乃偕黃何諸子而受業焉陽明  
子一見即語及門曰宏升盛德君子也語以格致之

要恍然有悟如久岐迷途而始還故鄉也自是省察  
體驗終食不違嘗曰人於此道如捕風捉影未嘗真  
知實究往往半上落下若知之真則行在其中矣陽  
明子曰宏升可謂信道極篤入道極勇者也嘉靖壬  
辰授廣東肇慶府判職司戎行舊例理戎官見三堂  
必衷戎服時總制陶公重登德望獨令以冠帶見蓋  
不以分職器之也四境逋寇登以輕裘緩帶消之三  
載以才優更廣州董餉其攸司也登剔夙弊清出入  
曰吾使會計當而已矣己亥銓曹課最授勅進階陞  
湖廣岳州府同知渭崖霍公聞知嘆曰人浮於官惜

哉任岳不數月詔徵九廟材於岳司空樊公都憲潘公遂專委焉登自是遍歷嶼峒殮白雪觸炎風從事三年而材木畢集二公暨御史桂公覈其勞績騰章交薦部議將顯擢適封公沒即日號泣奔喪抵舍浹旬母復亡貧不能具棺親友賻贈而後襄事居喪饋粥不給所親間以私干之登厲聲曰甯為露足被不願盈舟麥服喪三年哀毀瘠立竟以悲傷致疾服甫闋而卒疾革謂弟曰吾歷官十二年故我猶在或可見陽明先師於地下矣莆田鄭綱曰管公為新建高足得師授故其心精為學專故其政達由公之政以學者矣

李涑

李涑字源甫學者尊為養愚先生幼讀薛敬軒讀書錄嚮慕之刻不肯釋嘗謂人曰先生之言精實平易誠味之而有得益覺此心之不能如其言益覺其言之足發乎予心也密相參驗久而不輟其於古人蓄德之旨當自不悖久之恍然曰專尊德性而遺學問未免有類於禪大抵聖賢之學舍却存心致知工夫別無異徑自心性之說興於是與考亭諸疏時有異

同真儒不得已以明道下士遂浮慕以附聲甚者以陰符叅同曹溪柱下荒渺淺疎之談竄入語孟剽駁諸子不遺餘力昔者尼父譚道洙泗之濱獨以好學歸顏子曰擇乎中庸守之無失考亭之學實本諸此近白擇有意也守有迹也性本無物率之即道稍涉人力終虧天成真性苟悟一徹盡徹矣嗟乎孔顏力學終身弗足末學何奇一悟有餘然則自志學以迨從心中經許多漸次孔子之學無乃非率性乎別轉註脚以伸神解吾未之能從矣夫悟不廢擇貴密察也言擇而悟自寓悟不廢守固聖智也言守而悟以

存旨趣本一奚其歧之不苦心而云自得不量能而冀驟躋安得起尼父而面稟命之也又曰朱陸同異不論就當時真偽先辨一語今果能信從服膺否夫心口不符曰偽初終不一曰偽晦翁之學與其所以教人者可以言乎論道者曰真者不假作為順帝之則是也故一涉作為雖善而亦勉強非以是心至矣故曰偽嗟乎不思不勉詎非聖人擇善固執要亦孔子語也本吾心以擇善而勉強行之安得輒目為安排即後儒多所論辨吾終願學孔顏也何也生知安行可令天下人人能耶况吾不能是固不敢欺吾

心而隨衆口矣蓋涑之學由敬軒而溯考亭真所謂  
近裏着己不影附宗門者鄒南皋先生嘗曰雩都前  
有何黃兩先生為新建高足今李公真學問真人品  
比二先生相伯仲嗟乎斗大雩城名儒疊出豈非山  
川雄瑰故能鍾靈如是耶涑致政家居四壁蕭然惟  
聚徒講學雖大寒暑不輟晚刊薛文清讀書錄及何  
黃二集以訓迪後學為己任沒後既列祀郡邑鄉賢  
復奉配享濂溪陽明二先生祠門人又專祠邑中置  
祭田春秋舉釋菜禮不絕

按吾雩人物如管公登袁公慶麟何公春以理學著  
郭公端袁公慶祥以行業著嚴公球以廉介著皆前  
明傑出者百年論定久而益彰竟未崇祀鄉賢祠何  
公廷仁黃公宏綱尤為陽明高弟僅祀於縣未崇祀  
郡鄉賢祠李公涑理學名臣兼而有之未入明史皆  
為缺憾是所望於後起者之表揚也

文苑

前宋

鄧德明

鄧德明少從雷次宗學與韋遙等為同志友博物洽聞該綜今古尤好山水作南康記幽遐詭異盡為表出蓋一郡文獻之開先者  
按鳳渚謝公府志載德明郡人宋元嘉末就雷次宗學其時郡治正在雩都作南康記所表山水又於雩特詳其為雩人無疑因採入之

宋

雩都縣志

卷之十

文苑

四十二

朱申

朱申字維宣皇祐間有聲太學尤喜談兵嘗注孫吳既而以憂歸創書閣扁曰青雲當世知名士如王平甫黃安中吳景山鄭閔中諸公皆與交友會朝廷南幸邊臣議保甲申從行溪洞畢事桂帥用邊勞奏補攝尉龍平謝啟云天子顧南土之憂邊臣舉鄉兵之制尺籍交諭兩江翕從嚴保令之五人定武枝之三等勞振旅於五十一峒錄帶甲者八萬餘千便械用而攝高深外疆之蠻相若耐饑渴而習烟瘴中國之隸弗如適議保甲從行溪山手胼足胝深踐虎狼之

迹家至戶曉曾無雞犬之驚閱丁老幼之年計田多寡之數夙夜匪懈版圖告成攝尉龍平暮年而罷居家著述頗多與廣東林提刑書云舊撰論語孟子辨箋自號為熙時子鄙文赤行於世寓京都十餘年叨王府二舉中間連蹇禍故悲泣相仍歲未四十而目日以昏髮日以凋近時桂帥矜其困窮用邊勞奏補攝官申誠以計慮數奇豈復與議天下之務然念男兒處世以功名自期嘗著古今治亂之策邊防兵論共百餘篇揣摹諦審十有餘載而文未克就茲且完矣將一出其言上干真主幸而用之可以行其志於

零都縣志

卷之十

文苑

四十三

天下或置而不用申亦浩歌長嘯屏迹山林寄空言為後世計此其大略也申居極貧怡然自適後以疾終於家

宋志贊曰朱維宣亦一時人物與遊皆名卿大夫所擬語孟辨箋孫吳新注邊防兵論百篇皆失之今所存詩文一二攝官龍平而已惜哉

元

王沂

王沂字子與好學工文元季兵亂科目廢至正癸巳全普菴撒里分省贛州復設科取士沂以易領鄉薦

時詔儲撫軍得便宜授官以沂為福建行省照磨不赴尋陞亞中大夫吉安路治中亦不受洪武辛亥朝臣薦為諸王說書召至京數月授福建鹽運司副使以老懇辭賜歸屏居城西有竹數百竿日寄傲其中為古文宏辨浩博論古今成敗得失馳騁貫穿而折之於理後學皆宗之尤喜賦詩所與遊若襄陽楊伯謙秣陵周澣豫章萬古大梁辛敬清江趙鏞劉仲修鄉先生劉尚書昆弟皆有唱和著有竹亭退稿

明

袁慶雲

袁慶雲字德亨端子博洽莊凝有父風以歲貢任上

雩都縣志

卷之十

文苑

四十四

杭訓導日進諸生講貫不輟都御史韓邦問巡按至汀慶雲陳民間利弊六事韓以國士稱之親老乞歸奉養未嘗離左右親歿哀毀踰節遂以疾卒初端側室生子慶暘母卒暘幼雲撫弟成立友于之風鄉人服之著有龍門集

張顯

張顯字用晦生而奇雋長遊鄉校刻苦下帷博涉於古今墳史之間伸紙疾書千言立就宣德壬子舉於鄉明年上春官舟覆象牙潭溺焉時年二十八後邑人袁滄舟次象牙潭投文弔之曰天豐其才獨吝之

壽已可悼惜乃使之沉珠隕玉於涼煙野水之濱造化真不可解也雖然庸人之死死矣惟才人之精英不與腐草游塵同盡月白沙寒驚濤激射有騎長鯨而歌懷沙者必張君也嗚呼傷哉

### 袁淳

袁淳字育真慶雲孫幼穎異讀書過目不忘年十二應童子試構五經題義援筆立就主司見而異之補弟子員嘉靖丙辰成進士初授楚承天司理有治聲尋召入內臺奉勅巡按浙直進湖廣按察司僉事淳好學嘗謂近世士人討論工疎聞見汨沒於是取古

## 雩都縣志

### 卷之十

文苑

四十五

人之書上自周秦下迨元明旁及稗官野史柱下天竺之語分類編次第為二百二十卷名曰稽古大成論斷評閱具有特識今其書半軼焉自著有羅巖集

### 管煦

子一異附

管煦字汝和嘉靖甲子舉人既登鄉薦仍好學儻居豫章之東湖僧舍友奇士繙異書寒燈苦蠶畢盡心力踰年握管為古今文詞及樂府詩歌中丞吳栢鵬張岳見而歎服為之延譽嶺右蕭雲舉初以父宦遊雩嘗從授業煦性介潔不肯混跡公庭著書授徒外淡無一事以所得館穀洗腆承歡愉愉如也父卒哀

痛踰節啜粥飲水不履內帷者三年卒年三十八所著詩文十二卷藏於家

管一巽字景雷煦子少補諸生安貧力學幼與蕭雲舉同學於其父後雲舉以少宗伯進叅銓務遣使招巽至京念其貧欲削牘當道振之巽謝曰巽此來特乞公誌言不朽先人地下足矣他非所望也及歸諸所饋遺悉却之受二十金為資斧而還年老讀書著述不倦嘗署縣通判三與賓筵觀者咸慶為得人

### 李一龍

李一龍字子乾東二坊諸生生有異質聞邑何廷仁

## 雩都縣志

### 卷之十

文苑

四十六

講良知之學欣然執贄為弟子造誼不懈久而有省謂良知在人原無生滅有生有滅人見不同何與於道廷仁是之又教以人情物理皆良知之用學而棄於人情遺於物理即此知己非良知時一龍欲入衡陽養靜求道聞廷仁言若更有得遂止不行以年二十六天廷仁為文哭之謂子乾死吾道益孤

### 曾思遜

曾思遜字衷抑西一坊人家貧力學性質敦厚應崇禎十七年歲貢不仕篤志於古晚年著大易解義河洛理數解皇極經世詳註四民箴藏於家孝廉易學

實師事之嘗曰雩人知有古學自先生始為誌其墓  
又為文祭之略曰先生其古之人而非今之人也憶  
某少時嘗求古人之文與古人之行於一鄉之中而  
不可得乃偃然一室而不出交人既乃聞先生之文  
純於古而先生之行真率謹愨又無意於古而與古  
為類某乃慕而遊先生之門風雨晦冥無日不與先  
生同誹譽夷險先生亦無事不以古人之道相切進  
蓋歷三十年之久老成凋落風規絕聞尤恃先生為  
指車厭世之不古獨辭塵而長逝先生之沒則得也  
如偃然一室之人何觀學實文愈可以知其為人矣

國朝

易學實

易學實字去浮晚號犀厓幼無師從其父理卿學理  
卿教之異於他兒指架上曰此吾家世積書任汝取  
讀之久而多當自解自八歲後便好覽古奇編異冊  
讀輒能解若所素習者十一歲學為詩不喜淺近理  
卿見之曰大不類童子語亦不令作科舉文字年十  
六始學為八股創意度越雄矯離奇鄉里怪而笑之  
不恤也未及弱冠而孤家甚貧嘗不炊又會有家難  
非禮時侵實恬然忍辱益攻苦力學與楊維節劉勿

仙維人三先生相友善維節嘗言讀去浮文如對大國諸侯我輩眇乎自小東鄉千子艾先生重愛之以楊子為知言崇禎己卯領鄉薦庚辰赴南京不第癸未將北上止於章門時大河南北兵寇交訐乃驅車歸里奉其老母入山憂思感慨多見之詩文後以養母故累上公車非其志也銓授縣尹辭復授教職得缺終辭不赴堅卧梓里著書永日年八十有二終蓋學實之學雖若夙成然其理明而志定敦性而抑情才足以當肆應之求而不伐辯足以折盈庭之訟而不矜非潛思伊洛之書力行闕閩之學者不能編訂

李中丞文集付之剞劂手抄困知錄指示學人嘗曰宋儒千言萬語綜於整菴三冊則又開示蘊奧誘掖將來其功且及於無窮康熙丁卯督學何公棟檄邑有司崇祀鄉賢著有犀厓文集雲湖詩集椒齋制藝行於世餘詩文未刻若干卷存櫟園

梅賁□

梅賁英字子鶴狀頎瘠無鬚雙眸炯可射日性澹靜好山居讀書左國四傳及秦漢以下諸文史抄錄數過每歲除夕陳一歲所錄於案酒脯酌之曰此勞吾腕力以是補益焉家中疊架盈□百千卷詞義皆能

誦記順治丁酉舉於鄉同人欲出其制藝問世子鶴不願也請者再三因自序曰幽棲寒谷風雨十年古木高峰下遙絕塵俗惟與野客閒僧淡蕩於空濛瀟瑟之中凄然而歎悠然而歌有時思因花發想觸雲生興之所會遂成吾文云云六上公車不第退而著書與同邑李素文易靈虬李駿宇為鳴社文會易犀厓序之曰四子者子瞻所謂超逸絕羣士也吉水李元鼎曰子鶴骨勁神清文章道德之氣浩浩落落對之令人蕭然自遠其事業正未可量予重子鶴不徒以其詩文也卒年五十六所著有鹿谷制藝四書彙

雩都縣志

卷之十

文苑

四十九

解二十卷史論四卷詩集六卷

管奏諡

管奏諡字凌士號省菴餘姚高弟管登四世孫以邑廩中式康熙庚午科第十名舉人淡仕進明理學專講求心性之要處事接物謂不求便於己庶幾能通德類情恒語人曰凡涉世而一一易地返觀則恩無可矜怨無不釋矣性尤孝友授徒四方館穀所得供二親養祭外悉分以贖其弟昆有外戚負債鬻女於會邑諡盡一歲館資贖之以完其骨肉雩自何黃諸先哲講學功求內證新建之學瓣香猶在也有省菴

集存家康熙五十八年邑侯表章其實行聞於上雍正二年邑侯王復臚文集申請入鄉賢

宋應桂

宋應桂字芳誕號庸菴賴村人生時母夢人以桂一枝與之芳馥異常因以為名慕韓慕廬翁寶林制藝學焉并其意度波瀾得之因甲乙間東南變起鄉里蹂躪賊役難支以父命就武試登康熙庚午鄉榜甲戌成進士時年方壯人期以大用因母老不樂仕進隱於龍岡髦猶好學著庸菴前後集讀史管窺四書制藝武經註解武論稿甯都楊龍泉南豐趙與鴻為

零都縣志

卷之十

文苑

五十

序以行世年八十二卒遺命喪葬悉遵文公家禮不得作佛事

王龍德

王龍德字玉露精毛詩盡通諸家之說老於諸生居北鄉車頭每歲屆賓興迎至邑講經執業者屢滿門一時皆以經師稱之所為詩古文並工為處士李天溘題澄秋圖云長空一碧萬木落蕪風來山靜雲過字虛定於動靜有心澄如秋澄可況寫以此圖下筆灑落會心已遠知其得於經者深矣

周封魯

周封魯字紹祖西一坊監生不治舉業專意古學雩  
自犀厓主持文牘學者多有才氣馳騁封魯文特以  
度勝紆餘寬閒俯仰盡致詩尤工於體物五言如竹  
路晴疑雨蕉陰暑覺秋七言如春寒已薄偏欺酒夜  
色方濃轉怯燈烟橫看處初疑夜葉墜聞時似已秋  
皆晚唐人得意之句顧世多忽之封魯亦深自藏匿  
詩文散軼殆盡

### 黎文蒸

黎文蒸字儲彩諸生時甘貧力學繩趨尺步邑令趙  
愷會昌令董霏欽其品聘為子弟師與修康熙戊子

## 雩都縣志

### 卷之十

文苑

五十一

縣志壬辰府志由歲貢為臨江府學訓導勤於講學  
而秉性冲和日與諸生上下古今無倦志無厲容詳  
見侍郎楊公錫紱贈文解任歸凡十年年八十五卒  
卒之頃子孫問所遺言答云八十年來慎保身冰淵  
未敢擬前人生平行事無機巧惟恐此心失本真於  
此尤可見其為人矣

### 尹元貢

尹元貢字種雨性豪放博通羣籍工詩善書能自成  
家康熙己卯膺鄉薦屢上公車卷呈而見屏者再益  
寄情於詩字豪放之氣至老不改大雨登武當山詩

□萬頃白雲都化水一天秋雨欲移山之句視孟浩然氣蒸雲夢波撼岳陽知可相敵他佳句甚多張太史損持為采木客吟寶劍篇入澗水志林性不嗜酒喜啜苦茗為書淋漓自好然不輕作必俟飲茗得意閉戶為之求不能驟得多悵悒而去者家貧不治生產任直隸房山知縣一年卒於官有步堂詩集行世步堂歷朝詩選讀史日鈔藏於家

### 邱鎬

邱鎬字京西號恒菴東一坊人學行純粹幼穎敏讀書過目成誦父壇邑名諸生鍾愛鎬六經性理親為

講授復就家樓陳羣籍命鎬研辨其中鎬叅同考異析入毫芒屢易寒暑不變故學博而精持理要通經濟悉當於聖賢之旨性謙冲長厚勇於行善內行尤篤事父母竭誠盡敬年四十餘猶若孺子孝友之稱人無閒言鎬安義命樂清貧授徒給養教人以治心制行為主謂古來大儒內外一致人已不欺者此也乾隆甲子以歲貢生領鄉薦乙丑試禮部同考沈公愛鎬文力薦不第遂南歸杜門著書卒年五十三聞者慨息至為流涕邑令左公修品深有哲人之感厚賻焉有恒菴文集一得錄雲程日記制藝尋真家藏

黃士鈞

黃士鈞字念西舉人元珩子性疎簡自命矯矯於世少所周旋讀書慧明山寒暑不輟力學砥行足跡罕入公門為文法西江大家經書子史皆增註脚年廿餘餼廩膠庠雍正癸卯中鄉試第四名五試春官數薦不售益刻苦揣摩乾隆丙辰成進士雩邑甲榜國朝自士鈞開先任浙江宣平知縣數月卒於官未竟所施生平詩文稿未克付梓

宋啟傳

宋啟傳字周謨號範軒賴村人少穎敏博綜經史為

雩都縣志

卷之十

文苑

五十三

詩文才贍氣充一歸典則中雍正甲辰科副榜性恬淡不樂仕進選四川直隸資州州判不就築室低嶺曰雲梯山房日惟閉戶著書課子若孫後先取科名拾衿珮者指不勝屈邑侯高其學行聘修邑志家頗饒好行其德歲歉減價平糶洪流驟漲市民多溺於水買舟救活無算刻有存刪文稿制藝稿應試詩賦草

宋日量

宋日量字伊謙賴村人性沉靜寡言語父敬禧隆師葺館課之極嚴日量刻苦力學嘗入幽巖中默坐深

思夜至雞鳴不輟應童試邑侯岳公子恒奇其文謂曰江右後生繼五家而起者子也首拔之令入署肄業日量為文不趨時好渾樸堅厚直入歸胡之室屢赴鄉闈不遇以明經老刻有制藝稿行世姪啟忞少孤督之力學視如己子啟忞卒有成就並以文名

### 劉廷薦

劉廷薦字克致西一坊人苦貧力學有至性事父母啜菽飲水務盡其歡兄弟之間怡怡如也少讀書無膏繼晷每執卷依廟燈吟哦達旦不休如是者有年業大進尤邃於古詩擅開府之長名噪庠序從遊者

皆知名士嘗館於富室其家構大厦已得大木作棟卜日時位置其夜諸弟子回家廷薦獨坐無事移椅館門外乘涼二鼓後聞東人家爆聲喧嗔知上梁時也忽見一婦人披麻執杖哭泣而來廷薦起逆之曰娘子暮夜何往對曰兒子遊蕩未歸將往杖之廷薦曰某家此時方協棟隆之吉汝凶服過之謂有意破其兆也請少待婦人不允廷薦再三勸止不聽去久之更深夜靜婦人乃曰吾本天上披麻星也彼家時日實干犯我故來此今已過矣遂不見次日與術士會於東家私間之曰昨夜某時犯披麻否術士曰然

中有文曲星解之廷薦心竊喜隱隱以鼎甲自負及應鄉試七藝俱佳房官擊節嘆賞擬元主考擬魁不決竟置之僅以明經老惜哉著有四書心解藏於家

### 李得運

李得運字位公號益齋少讀書頗健忘憤悻之餘豁然有悟遂日記數千言弱冠補弟子員旋食餼歲科屢列前茅乾隆己酉入闈三題皆宿構心喜甚及展卷錄之無一字自是絕意進取生平教授生徒多所成就堂弟解元睿胞姪孝廉聖裁皆其所淑睿好讀古文而得運謂文以明理理莫精於四書而衍為制

## 零都縣志

### 卷之十

文苑

五十五

藝制藝者運秦漢以來諸大家之法以代聖賢言而抒吾性靈者也故睿自謂時文得出而見天下者伯氏力也晚貢成均任玉山訓導教士有方年餘解組歸家居儉素手一卷書兀坐終日恂恂訥訥從不訾人之短非意相干不與較卒後玉山人士猶思之不置子秀明經人品學問亦饒有父風

### 陳家駒

陳家駒字千里東二坊人少聰穎讀書不數遍輒能成誦稍長博記覽讀秦漢唐宋人文恣意探討必窮精微為詩文俊拔異常同輩李睿心折之與訂莫逆

交家赤貧不苟取疏食菜羹不能自給不以為意晏如也年二十九中雍正丙午科舉人三十六而逝

### 段彩

段彩字孫錦號絅菴車頭石溪壩人少力學補弟子員中雍正壬子科舉人乾隆甲戌成進士謁選得湖北宜城縣令慈惠愛民每用刑目不忍覩輒掩其面時麥穗兩岐民歌頌之既與郡守不合致仕歸性樂易人或加以橫逆不藏怒不宿怨有過輒面斥之無少諱設教鄉里遊其門者多取青衿登賢書為文宏博鉅麗邑侯高公聘修邑志筆削皆出其手

## 零都縣志

### 卷之十

文苑

五十六

### 李睿

李睿字淇聖號菴園生而穎異弱冠受知督學李公鍾僑補弟子員明年充拔貢比

廷試睿當得州縣以親老弗就歸而閉戶窮經博極羣書每有心得喜為詩古文詞不落前人窠臼制藝則閒為之真氣盤鬱有古大家風邑侯左公修品聘修邑志睿獨出體裁考核精詳直筆無私為邑人所詬病撫臺命其略易數條睿執不依乃聘段公彩改修然李志間猶有存者其優絀終不可誣也誘掖後學科第多出其門而身困場屋者三十餘年每試不作第

二人想中乾隆庚辰

恩科第一座師王公際華以鼎甲期之三試禮部王三為總裁而睿卒不售後辭歸王憮然曰謂我不知汝吾以汝為解首矣謂我知汝則汝猶一解首也睿為之歲涕時睿年六十越二年遂卒睿為人狀貌魁偉聲如洪鐘雙眸炯炯射人性孝友居喪絕葷酒者三年兄弟衆多得館穀分給之與人恭而有禮雖卑幼無敢慢而耿直不避人恒過面斥之與明友爭論古今人物及文章詞辨鋒起喉下筋起如筴邑侯鄒公儀與相契每昏造其廬談論不輟睿言不及私有非義

零都縣志

卷之十

文苑

五十七

干者力却之卒後鄒為之傳略曰予觀其文知其為博物君子也考其行知其為篤行君子也著有菴園詩稿古文稿易經咀言

段廷遴

段廷遴字掄書車頭石溪壩人年十九與堂兄彩同補諸生伯仲共相濯磨中雍正乙卯科舉人乾隆壬戌中明通榜庚辰成進士授瑞州府教授日與諸生講學論文亶亶不倦在任十一年郡人士服其教性友愛已置田產以分兄弟撫孤姪如己子備極勤劬親族有困乏者量力周之無吝色為文根柢經史著

有時文稿

譚源

譚源字養泉號清亭澄江人少從賴村宋啟傳遊為制藝出語有如老宿啟傳期以遠到年二十三中乾隆戊午科武舉明年成進士赴銓北上將至豫章時祖母年老意鬱鬱不忍其去父以書示之源慨然曰吾安能以一官貽祖母憂也亟趨歸自是不復出山喜為詩古奧簡樸不事雕琢刻有清亭詩稿

曾躍龍

曾躍龍字汲三少補弟子員專意古學善屬文與解

雩都縣志

卷之十

文苑

五十八

元李睿為石交同修邑志大學士鄒公炳泰為諸生時嘗至其叔邑令鄒儀署常以文就正躍龍後督學江右至贛猶問訊之惜詩文散佚僅存玉荷巖記今入志

宋昌悅

宋昌悅字粹天號暢谷啟傳子賴村人性孝友事父母得其歡心兄弟八人終身無閒言為人渾穆靜默表裏如一讀書別有會悟於古文獨喜歐陽公魏叔子於時文獨喜金正希為文雄渾超邁無一語寄人籬下不必有意學古人自與古人相似中乾隆己卯

科舉人庚辰挑選得教官歷署上猶安仁教職選泰和訓導勤於課士士爭就之在任六年士習文風翕然有起色丁外艱歸閉戶著書同時相唱和者瑞金孝廉羅臺山蘇州進士彭允初族中兄弟昌鳳昌琿昌圖華國光國性好山水時與諸子遊天馬二崖月潭諸勝賦詩為樂著有暢谷古文稿詩稿時文稿

### 宋昌芹

宋昌芹字泮草號楚園賴村人祖鳳依遷居贛城孕十二月而生洪聲碩膚幼質魯刻苦力學積久頓悟以能文稱中乾隆乙酉科舉人辛卯成進士引

## 零都縣志

### 卷之十

文苑

五十九

見以禮部主事主客司用克稱其職旋充順天鄉試同考官入穀者多知名士大學士蔡公新深器之期以大用既念親老乞假歸省觀察某公延為濂溪書院山長開導後學不倦鄉人有攜重金以私干者却而不受曰吾家世清白無需此為未幾白晝夢羽人招之曰我蓬萊客也遂以疾終

### 李聖裁

李聖裁字泗傳號杏壇天資穎悟博通經史古文作為制藝得鄉先輩五家神味歲科試輒冠其曹乾隆乙酉督學周公煌取充黜拔貢生甲午鄉試有司賞

其文以得卷遲幾被遺及閱其策歎曰此冠場之作也舍是無進呈者乃領鄉薦時年已五十二矣李氏多才解元睿以詩古文名明經得運以制藝名聖裁為其猶子均受業焉故得兼其長惜不顯家居授徒擁皋比者垂五十年其教先行誼而後文藝弟子連郡縣多所成就取青紫者無算焉嘗代邑侯安公穎新作祭章嘆曰予久聞李孝廉之名從未謀面今觀此手筆是第一流人物也文稿多散佚門弟子處藏於家者惟制藝百餘篇詩古文數十篇

宋華國

雩都縣志

卷之十

文苑

六十

宋華國字雨宜號立厓晚號退菴賴村人啟忤子性穎悟博學能文制藝外尤喜為詩古文詞受知督學周公煌充拔貢生少與兄昌圖弟光國並師贛縣鄧自軒講明程朱之學以敦倫常濟民物辨義利為要事父母盡誠敬授徒資菽水父歿選授石城教諭迎養老母題其署曰祿養堂侍母病累月不解帶母卒官舍時值山水驟至柩將漂流華國哭禱於神柩卒無損伯兄無子屢為買妾晚年竟得子族戚困乏及不能葬娶者量力助之每勸人置義田立義學謂濟民生培土風莫急於此嘗語人曰讀書須明體達用

徒自淑其身而無濟於世不足貴也先憂後樂豈以窮達異耶在石六年振興士類教以敦行學古季考月課斧藻其文并為口講指畫遠方至者飲食信宿於署邑人士喜告訐反覆曉諭寢其事乃已有強梗者必懲創之有為縣令所抑者力為辨釋俾免於罪多人六年中士習文風翕然丕變嘗曰吾惟盡吾職所可為而已丁內艱歸士錢河干者數百人率多流涕有至其家受業者服闋署吉水訓導與在石無異旋補彭澤教諭引疾乞長假居家不入公門居官不干上官督學翁公方綱深敬禮之試士甯都有以私

託者厲色拒之同時名碩如瑞金孝廉羅台山有高新城進士魯絜非九皋南康中丞謝蘊山啟崑蘇州進士彭允初紹升與為石交並以文名世設教鄉里成就者衆精岐黃術嘗製藥丸刊藥方贈人活者無算工書法神似米董古文似歐曾詩似王孟著有立厓文集制藝詩稿石城志謂其學問優長師範端嚴以詩古文詞倡起後學勤於課士士林悅服歿後石城人士思之猶為流涕瑞金令陽湖惲銘其墓

邱祖澤

邱祖澤字解泉號心墅西一坊人少負異質篤志力

學出應童試邑侯傅公奇其才拔置第一旋補弟子  
員年二十三中乾隆壬申科舉人屢試春官不第截  
取知縣時母老在堂曰古人不以三公易一日養吾  
豈忍離慈幃而遠仕耶因乞終養丁憂服闋改就教  
職選靖安縣教諭本躬廸士振興文教在任五年卒  
於官櫬歸執紼送者載道為詩文力追大雅刻有經  
傳聯珠傳播士林文稿詩稿未刻

### 易軾

易軾字煥堯號蘇湖南關廂人少好學沉潛經史獨  
具見解為文瓣香五家中乾隆辛卯科舉人素履端

## 零都縣志

### 卷之十

文苑

六十二

方岸然道貌當道慕其名未嘗輕投一刺丁未大挑  
二等歷署新城金谿武甯上猶九江府學教職補彭  
澤訓導課士先品行次文藝嘗曰品行本也文藝末  
也有文藝而無行品吾儒所不齒也邑人士咸服其教  
祭酒張公錦枝為文壽之曰入先生之座如沐春風  
聽先生之言不減秋肅其梗概可想矣著有易經心  
解禮記周禮辨義書經折衷詩經釋義春秋滙叅

### 宋昌圖

宋昌圖字道原號畏軒賴村人少補諸生父啟愷命  
謁贛縣鄧自軒教以程朱之學篤信不疑遂以聖賢

可學而至日玩性理一編學大進居恒以敬為主因作持敬主一二銘羅台山瑞金名士常治兵家言授以二銘引見鄧自軒遂變其所學弟華國光國講道論學相為師友家貧授徒養親不苟取嘗曰志士不忘在溝壑著有畏軒集訓蒙要編藏於家

蕭明

蕭明字睿遠號鏡亭半邕人幼英敏為文超邁年十五雄長文壇補弟子員旋食餼試輒高等屢薦鄉闈不遇貢明經選授鉛山訓導好學不倦博覽羣書模楷多士訓迪有方並精選擇鉛邑修學宮構訟七載

零都縣志

卷之十

文苑

又六十二

五科未有中式者明為十吉改修越三月訟息丁卯獲雋四人自是登科第入詞館接踵而起鉛人德之又捐俸數百金增修學署書室數楹士林便之事詳熊謙山尚書文年七十九終著有時文稿

劉建

劉建字道原號立齋歲貢生西一坊人生而穎異讀書過目成誦為文規撫先正髫年偕兄鼎新應童試昆季縣府各冠一軍時邑中有郊祁之目受知督學張公旋食餼試輒壓曹偶屢薦秋闈不售因絕意仕進以明經老晚年教學家塾庭訓維嚴子姪之振興

者多由其造就尤深於易嘗與同人講易凡爻象之精深啟蒙附論之奇闡剖晰義蘊言之娓娓聽者忘疲著有周子太極圖解方圓圖說

### 宋光國

宋光國字尚賓號二厓賴村人啟忤子幼授章句即通解大義稍長以家貧躬耕隴畝暇則手握一編未嘗廢學兄昌圖華國坐論古人每從旁質一二語兄大驚喜謂初學罕及此者父乃命卒學時年已十九矣光國益自發奮旋補弟子員中乾隆乙酉科副榜喜為詩古文詞尤孝事父母素愛二崖之勝因自號

## 零都縣志

### 卷之十

文苑

六十三

二厓刻有二厓詩集行世惜壽不永卒年二十九

### 邱苑春

邱苑春字景梅號雁汀西一坊人少從瑞金進士楊于位遊日沉酣於經史發為文章議論宏肆閒為詩歌貫穿古今而能自抒其性情楊氏多詩人無能出其右者就北闈試留京七年日下名流皆為傾倒以母老歸中乾隆丁酉本省舉人明年試春官不第卒於京邸公卿弔者盈門

### 宋昌鳳

宋昌鳳字翮西號桐山賴村人家貧刻苦力學少時

讀書僧舍夜依佛火竊其餘光自是業大進為制藝  
涵茹經傳氣烈才雄屢見賞於學使試輒冠軍中乾  
隆戊子科副榜雅善詩築室頤巖嘯詠其間與族兄  
弟昌琤昌悅昌圖華國光國鴻猷凌霄伴瑩為文會  
名花萼堂著有桐山時文稿行世詩稿藏家

黃成棠

黃成棠字召貽西一坊人郡廩生沉潛經學會通註  
疏歲科試經解屢為學使歎賞設教鄉里與學者講  
明經訓瞭如指掌著有禹貢會纂春秋彙纂周官節  
訓應試經解

雩都縣志

卷之十

文苑

六十四

葛一榮

葛一榮字維城號禹門葛垵人生而穎異博覽羣書  
為文敏捷英年食餼試輒高等鄉闈屢薦不遇貢明  
經選授南昌訓導歸設教里門栽培後進騰達者指  
不勝屈著有禹門課藝禹門稿行世

宋惟駒

宋惟駒字志遠號月臺啟忞孫華國子賴村人聰穎  
異常讀書過目成誦所作詩古文詞皆淵源家學為  
文壇鉅手嘉慶丁卯舉於鄉署豐城訓導旋授奉新  
訓導教士有方因老乞歸邑侯聘主雩陽書院講席

勗諸生以敦品力學士習文風為之一變今猶稱之  
道光癸未纂修邑志刻有月臺課藝

譚欣

譚欣字快人號陶村澄江人天資英敏博通經史制  
藝一宗先正尤工詩古文詞見推哲匠壯年食餼秋  
闈屢薦不售貢明經設教家塾遊其門者多資成就  
道光乙巳與修府志觀察李公本仁稱之曰此老儒  
宿學也年八旬餘猶嗜學手不釋卷著有陶村集陶  
村詩稿制藝稿藏於家

零都縣志卷十

人物志

唐處士

賴棐

賴棐字忱父七歲能文及長博綜經史百家言乾元二年舉進士甲科授崇文館校書郎不就退居田里種竹條桑曠然自得也大曆初李景暘作令謂耆舊曰龐統里號冠蓋鄭元閭稱通德棐方古人夫復何愧即其所居號秘書坊以表之註萬姓通譜行世

宋

王鴻

零都縣志

卷之十

人物處士

六十六

王鴻字翼道右軍廿四世孫工隸篆善八分書文章古崛峭勁皇祐中以鄉舉遊大學再薦省試第一因作衆賢和則萬物和賦云九官相遜鳳儀虞舜之韶多士以甯魚躍文王之泚誤作沼失韻被黜柄文者撫其卷而歎息之鴻歸擇邑南四十里泉石清幽築室隱焉字其山曰崑山泉曰龍光液松曰甘露松鑿石袤丈曰涵虛洞洞之右曰需巖巖畔桂樹叢立曰木樨巖折而下為釣臺好風和日輒與客為釣魚會手自調羹用野菜四十九鹽一號太衍羹笑謂客曰自勝無礙羹况五侯鯖耶嘗為困銘曰廉則易足斯

廩有敖倉之蓄貪則無厭芻豢有糟糠之嫌夫竊人之食而不任事又騷然而為害者鼠也暴人之物而不知畏又肆然而加毒者虎也吾不忍暴而為虎不肯竊而為鼠甯守斯廩以安吾處郡守劉彝以書幣聘主郡校不就復書云鴻溺於山林未嘗挾技藝事奔走自鬻王公之門木石之與交麋鹿之與遊於聲名之顯晦固已無累於心矣其於學問固已疏進退趨翔固已放而野語言辭氣固已迂而不切於事情矣考行責實無以當明公之求不揣而往自取羞戚玷閣下之階庭閣下之悔不旋踵而生矣何以掩千

里之觀聽哉伏惟垂照使得全其性分與葛童牧叟謳吟於巖穴之下彝不能致作詩以寄懷曰冬寒夜憶王夫子獨坐需巖看古書自恨虎符難命駕白雲無意離山居周茂叔侔郡時相與談先天之學大相契合其歸山也作詩贈之鴻答謝曰臨別溪頭承誨囑此心當為聖賢求邑宰張宗諤致之弗得築亭於城西望之名曰望需侍郎張頡聞於朝曰臣竊見虔州處士王鴻志行修潔篤學能文皇祐中屢與省試不中今年四十餘耕田種桑以足親養居約處晦視古為歸閒推所學以教鄉閭子弟如鴻雅操誠足以

扶世教勵風俗蔽而不獻是廢善遏美也伏望朝廷特加旌獎以勸士類不報鴻雖得朝野譽而著書樂道將終身焉所撰詩文及太元經多散逸惟困銘傳世云

陳維

陳維字康侯方期之後先世有祖乾任常侍廣任節度推官世為雩著姓維力學有行誼於邑之密園立萬松莊闢義學教授鄉里學者多歸之顏其屋之中曰浚堂室之奧曰頤閣而自為之箴曰堂之所謂浚者豈不欲浚其源而使其泉之深而不涸者乎閣之

所謂頤者豈不欲頤其身而使其體之充而不歉者乎源深則泉潔體充則道備苟涵養之未至則有泥而弗食之嘆餒而弟充之歉故君子自強於夙夜而無或弛甯也饑寒之患幸而不及利欲之私絕而不萌沉潛醞籍馴致其極然後見頤之功浚之效其所以然者不徒然也需巖王鴻嘗登其堂臨閣上顧見所自為箴贊曰純鈎之鋒銛能制鐘非磨非礱缺然頑銅并里之鐵厥塊無別琢而器之光價非越嗚呼人與曾此之異不學而能前聞猶未主得其人師賢友懿實為士徒養勇之地談不離道居無越位善相

告語惡相阻棄美無他遜光宜自闕積其所修聖賢  
可至維五舉不第後應八行科人稱陳八行云

元

劉君賢

劉君賢本姓袁元末不樂仕隱居城西授徒著書分  
府王榮忠高其學行上書薦之笑不應作詩曰桃源  
何處可逃秦直為雩山作主人宇宙百年甘白首關  
山千里走紅塵名時將相雖無種歷代帝王自有真  
長夜漫漫須待旦嚴冬極處是陽春蓋知元祚將終  
而識天命有歸也著有學問要編及昌雩集見文獻

雩都縣志

卷之十

處士

六十九

通考

明

李喬崇

李喬崇字期厚少以孝友聞博綜六籍精公車言偶  
閱邑乘慕宋賢王鴻陳維之高義遂棄舉子業翛然  
有需巖松莊之志乃築北郭草堂而棲隱焉因號北  
郭野人每觸景會心輒發為歌詩同人連篇賡和大  
類香山蓮社嘗有志餘姚之學聞同里何善山先生  
得其心傳遂執贄事之一聞良知之說即篤信力行  
不復疑阻既而泛蕪陰溯金陵泝姑蘇千里齎糧遍

質有道已復放舟鷺□往來青原石蓮間與聶雙江  
鄒東廓歐陽南埜羅念菴諸君子辨析微茫叅訂同  
異東廓尤雅重之嘗手書學聖堂箴以相勗焉一日  
與念菴方湛一論先天之學念菴驚起曰君從何處  
得來即占一律奉之有曰說向世儒渾未悟羨君神  
授豈由師而幽棲羅巖凝神靜坐嘗以真一之旨教  
人曰真一之道乃修身正心誠意關門與舜文孔孟  
惟一純一道一之旨後先一揆人稱為真一先生  
李養愚曰北郭先生予叔祖行也少學於善山何子  
年七十八猶進德不倦督學趙公淵聞其賢聘見於

行臺與語大悅以鄉祭酒稱之御史陳公任公嘗齎  
縑帛存問先生蹙然以懼曰吾之學固以求其有得  
於己同其樂於人也而姑以飾譽馬則何所貴於學  
吾何能無懼嗚呼古所稱闇修君子者先生其人歟

孝友 義夫附

晉

陳方期

陳方期字長年太康初太守徐仲景辟為功曹不就以孝行稱親喪晝夜號泣幾於毀滅一夕假寐若有人語曰無益存亡願擇出處方期驚起服除遂始終不仕世高其行

宋

謝孝義

謝孝義失其名母孀居守節疾甚乃割股療之鄉民

雩都縣志

卷之十

孝友

七十一

狀其事於郡時提刑劉筠攝郡事給以錢米即其門匾曰孝義今率口是其處

羅遜

羅遜父亡毀瘠骨立殆至滅性及葬持畚鍤荷土為墳廬墓側朝夕躡躑如新喪每飯跪獻哭聲隱隱振動山谷蔬食水飲凡三年縣令劉藻造其廬慰之

余孝生

余孝生邑東人紹興間父病篤諸醫計窮無所措余揮刀仰天大哭曰父死吾何用獨生苦吾死而父得生死又何恨遂割股肉以進父病旋愈縣令劉藻嘆

曰割股雖不軌於正然可以愧夫親病不嘗藥者遂旌之

按名宦傳宋紹興間劉藻令雩其前任王鬲作孝義圖化民藻因其舊本列二十四圖像著文刊布使民誦習佩服邑民化之割股救親者凡六人四失其姓氏止存謝余二人而謝猶逸其名其割股療親事在令甲即不與旌是扶持倫教之常道禁民為詭異之行也然於此竊幸人心不死一服孝義之訓在椎魯者亦歲奮於不自知此時此心夫豈出於有為耶於戲前古後今猶是民情孰謂頑不可化而司化者動

雩都縣志

卷之十

孝友

七十二

以民自諉耶

明

孫思遠

孫思遠邑城東人博覽羣書言動皆有矩矱洪武中知縣宮好禮以秀才薦入京試優等注官不受曰鞅掌風塵何如承歡子舍也遂乞歸養別構奉親堂以居侍膳問寢日愉愉奉老人歡母卒號痛幾絕葬祭悉如禮修撰練子甯御史解縉邑人黃輔鍾愿有文述其事

劉瑁

劉瑁字輯瑞有至性父歿嬰兒嘔徹晝夜廬墓三年  
淒風酷雪夜半猶聞哭泣聲提學邵寶檄有司問慰  
母歿亦如之竟以哀傷死都御史王公守仁檄縣令  
嚴鑾祭其墓親題孝子門旌之

王維

王維字潛拙鴻裔孫博綜六籍為邑諸生以五經授  
徒嘗遊李養愚先生之門醅謹篤學言動不苟家貧  
竭力事親及親歿墨瘠焦枯知縣賽啟皋造廬問慰  
上之督學表曰孝子之門

謝天詔

雩都縣志

卷之十

孝友

七十三

謝天詔字紫宸別號非齋性穎敏過目成誦常自信  
所為文隨父任撫州與徐筆峒陳大士友每構藝輒  
鼓掌相推服父任未四月卒於官清介無所遺詔痛  
哭典鬻扶櫬歸里母性烈事事先意承志稍有弗悅  
必恐懼引罪侍立終日中崇禎己卯副榜應選貢廷  
試選充北雍朝廷欲除以御史緣親老未就晚年潛  
心理學上自六經下自唐宋百家無不丹鉛而錄評  
之暇即澆花植木雖釜甑生塵淡如也著有天官撮  
要世系等編藏於家

李一松

李一松字茂甫質性純粹積學善屬文萬曆壬辰選貢充北雍晉江李文節福清葉文忠見其文咸稱異之試棘闈不第慨然曰玉堂何如子舍章服何如萊衣吾非薄宦達也其若垂白老親何遂歸絕意仕進依依膝下如嬰兒家貧以筆耕資菽水晨昏左右愉愉以承其歡心有弟一柏出入必偕甘苦共之孝友之風間里嘆慕李養愚先生講學羅巖松師事之居恒衾影必嚴雖在造次不違於道當時稱李門入室弟子者首推茂甫一人修撰劉同升曰李公微行不勝書大約孝友至性人也李中丞不輕許可人獨心

折茂甫其品行可知矣松年四十八卒配祀養愚祠崇禎間督學副使吳炳檄縣崇祀鄉賢

李逢月

李逢月字雲將別號凌虛一松子天啟辛酉舉人幼賴異下筆驚人目能對射日光不轉瞬父奇愛之及長以孝聞父歿匍匐苦次墨瘡不能起見者傷之時繼母袁氏抱素月遺孤月家貧舌佃以供老母歡其後教育幼弟餼二十人中嘗遊鄒南皋先生之門甚器重之月性恬淡重清議敦古道終日鍵闕靜坐如深山學道人崇禎甲戌御史李公宗著列其行誼薦

於朝庚辰還自都門語友人曰國勢如敗局矣當事諸公猶攘臂而爭殘劫奔非國手劫復連環可奈何遂謝公車慨然有棲隱之志及兩都淪沒乃徘徊北山抑鬱成疾而卒

國朝

劉洪允

劉洪允唐村里人父思穆充禾豐練長順治乙亥九月隨父統鄉勇從縣令李祐之勦李玉廷失道奔北已逾數百步矣反覓父父曰吾憊矣兒自逃生可也允曰脫父死兒何用生為以頭支父背而行賊尋追

雩都縣志

卷之十

孝友

七十五

及遂併遇害

朱士昂

朱士昂長樂里橋頭人康熙十三年崖石賊掠雩之北鄉士昂母李氏被執昂冒賊刃哀泣隨母賊索其鍰贖昂同妻鍾氏賣身本縣曾某得銀贖母曾憫其志還其身契奉母歸竭力孝養母歿殯葬盡禮廬墓守孝乾隆二年奏

聞旌表建坊入祀忠孝祠

黃裳吉

黃裳吉弟鍾律俱貢生篤愛均財數十載無閒言裳

吉卒鍾律每食必設杯箸潛然悲呼而後食初鍾律庭有繡毬一樹日晡後兄弟恒聚坐其下裳吉死鍾律每夕必撫樹痛哭鍾律死而繡毬遂枯人以況田氏荆樹焉

### 李開蕙

李開蕙字歷草東二坊人以生日母死八歲後遇生日鍵戶水漿不入口歲以為常屆五十一諸子懇親友勸之出食甫下箸而嘔竟以是得反胃證死之歲年六十五疾不安枕者已數月屆生日仍不食如前作詩云相傳此日中元節人有誠心鬼可求一面母皆備盡色養之道

### 易大觀

易大觀字上賓邑庠生南關廂人生有至性事父母菽水承歡必竭其誠父母疾不解冠帶而養累月無倦容及卒哀毀骨立行古三年之禮不飲酒不茹葷寢苦枕塊廬墓者先後各三年家貧以舌耕解元李睿少時嘗遊其門自幸得聞古人為己之學大觀後更謝生徒尋濂洛淵源依僧居龍溪僧舍睿一日造訪因問濂洛之學大觀出太極圖指示謂之曰未有

天地之時一氣渾淪無有空隙動而生陽動於何始靜而生陰陰於何象睿應聲曰無所不始而始於中無可為象而象在內大觀為之首肯其於濂洛之理蓋實有所得焉然邑人知其學者少欽其行者多羣推為孝子云

宋啟佺

宋啟佺字立夫賴村人隨父遷居贛城父先逝事母嚴太宜人孝謹親為洗瘡滌糞弗避腥穢三年不懈母歿喪葬盡禮地不吉改葬皆已任之不取之兄弟學師廉其行舉以優督學金公牲稱之曰如宋生者

雩都縣志

卷之十

孝友

七十七

方不愧名也遂得充優貢己亥舉於鄉屢上春官不第家貧授徒為業未嘗一千州縣鄉人稱為真孝廉云

黃期林

黃期林字星如東塘人傳詳藝文

葛明蔭

葛明蔭字遇春葛垵人少讀書不務詞章以敦行為要生數歲而孤事母孝謹和氣婉容家故貧奔走四方以營菽水出門即囑其妻曰汝須善事老母毋忤母意妻不聽出之母卒葬窮山中荆榛荒蕪明蔭於

墓右架木為廬累石支釜啜漿水寢苦塊族黨憐之饋以錢米常不繼斷炊累日如是者三年縣令雷公學淦過其里親迎之歸告於督學王公鼎旌以匾曰孝子之門

黃名濬

黃名濬字睿堂西一坊人少讀書應童子試補佾生父歿殯於西郊嘉慶庚申七月大水名濬匍匐至殯所防守甚至水旋湧漂流數十里名濬抱柩號泣呼天逐水去抵高灘賴漁舟救之起柩以無損人推其孝

雩都縣志

卷之十

孝友

七十八

楊若賜

楊若賜小溪人生有至性事父母晨昏定省不少懈父母歿哀毀骨立廬墓而居前後凡六年族人迎之始歸

蕭天慶

蕭天慶字藹庭半邈人生有至性父與生母早逝事後母極謹先意承志凡後母所欲悉如其意母患夜咳慶立門外靜聽俟母咳止然後就寢如是者率以為常母歿喪祭盡禮痛哭跪拜家人慮其憊勸止之仍如初慶曰是非爾所知也吾行吾心之所安而已

時天慶年將八十人呼白頭孝子

### 葛偉才

葛偉才葛邛人少穎異績學未售恒謂大丈夫縱不能得志功名當求無忝所生兩垂白在堂必親自扇枕温衾歷數十年無稍懈迨隔月繼逝殯葬盡禮饘粥齊衰哀毀骨立待兄弟雖分產析爨而聚順怡怡終身無忤色族鄰稱之

### 劉世閔

劉世閔字著勲號笏堂歲貢名謙子西一坊人賦性英敏博覽羣書為文超邁少補弟子員四歲失恃及

成童事繼慈愛敬倍摯恒得其歡心其事父尤難能父體素羸胃氣疼痛秋冬更劇不惟奉侍湯藥維謹每逢痛時常以頭抵痛處痛乃稍止夜間不遑安寢衣不解帶者數十年及歿殯葬盡禮哀毀骨立遇忌日必齊戒致敬至老勿替當時士林常以孝翁稱之

### 張桂輪

張桂輪字肩瑚號蟾莊南鄉峇嶺人秉資聰穎又極沉潛七齡失恃事繼慈丁孺人閱一年而父又見背上無伯叔惟依繼母并祖慈袁孺人兩嫠愛之如所生延師課讀教比熊丸率二弟朝夕凜遵卒皆成立

年弱冠補弟子員旋食餼貢明經情篤友于與其弟  
終身無藏怒宿怨鄉里咸稱人無閒言

李官玉義夫

李官玉字麟書玉山訓導得運之子明經秀之弟也  
狀貌魁異有才幹而嚴氣正性從無二色娶妻邱氏  
琴瑟靜好生二子俱幼而邱亡官玉年方二十六力  
能娶人爭欲妻之官玉曰吾亡妻已委身於我矣吾  
不可以負之遂鰥居以老卒年六十一已抱曾孫焉

質行

明

謝祐

謝祐字信齋水頭里人甯子性穎異善事二親博涉羣書不喜治公車言曰不能枉吾性以逢迎主司也先是雩都每歲協助贛縣南康紅站船五隻派夫五十名又於里甲內歲編民兵協助會昌防禦及安遠板石巡檢司弓兵十名百姓疲於奔命祐慨然曰雩孱邑也且衝日供過客夫馬不暇給安所得餘力協濟鄰封吾不忍坐視雩民重困也所恨地介遐陬小

雩都縣志

卷之十

質行

八十一

民疾苦大吏不以上聞布衣不言誰為上言者於是遂走五千里赴闕上書言雩都衝疲鄰縣夫船兵目實難協助奏入奉旨該兵部行江西撫司會同計處務使徭役均平衝疲獲蘇祐遍控院司等衙門備狀雩民困苦遂得覆奏允除鄉人至今德之宏治初下詔朝野利弊許各疏陳祐復携長男國玉渡江淮而北復詣闕條議二十二事言宜相賢良以輔治道節國用以恤民財會昌不應設防守參戎徒滋民困長河堡宜建巡檢司以統御鄉勇運河貢船多冒濫糜費隱匿之弊宜除官妓以肅官常勵風俗孝宗見其

言切直先行其六事時當國者不厭望故祐首以相賢良為言意蓋有所感也都御史李公昂手書天朝納牖四字為贈金公澤韓公邦問見疏歎曰此匹夫而有天下之慮者也歲時以禮存問之

### 李鈞

李鈞字見山東二坊人中丞李涑父素性淡泊不營產業道遇殍者輒捐貲葬之比貴益自匿惟手一卷呬唔不休里中稱太古人初涑為寶應令鈞至縣就養適大水民飢涑所入俸盡市穀飼餒人囊無餘錢强市鬻肉為供鈞曰兒為官猶蔬食我田父也乃肉

### 零都縣志

### 卷之十

質行

八十二

食耶屏之食蕨薇將卒戒家人喪事母作樂毋事佛

### 劉乾鯨

劉乾鯨字復一西一方人少補諸生遊中丞李涑門勇於自治嘗書勿謂善口不為惡小為之二語懸於座右以自警省舉動未嘗一踰防檢李涑雅重之子應異髫年入泮為文刻苦出語驚其曹矢志勵行饒有父風以歲貢終父子均配享李涑祠

### 國朝

### 康同祓

康同祓字封古號園水頭里人幼聰敏好學年二

十補弟子員第一康熙己卯舉於鄉座主宮詹查聲山特器重之嘗語人曰吾得康生如陸敬輿之得崔瓊也性方嚴持己清潔不肯追逐時好日閉戶讀書非公不至宰室聞人有不義必大聲疾呼怒見於色為考妣營喪葬盡己所有不以累兄弟赴公車墜馬傷足遂絕意仕進日飲酒賦詩自娛疾革時家人環泣問身後事徐瞪目視圖書數篋曰吾家業盡藏於此汝輩守之食不盡矣子緒能讀父書亦領鄉薦

### 宋啟忞

宋啟忞字健亭號乾齋賴村人父日景懷文早世彌

留時誠以力學敦行每讀書夜半念父遺訓痛哭不已母歿事繼母孝謹季弟啟懃繼母出也撫恤備至不率輒予杖述父遺訓而泣季亦泣乃已授徒所得館穀悉與季共之無私蓄姊歿時館遠方歸而哭諸殯室凡三宿而後反性剛直表裏如一人有過必面斥之有侵犯弗與較見人危急勇赴之利害不計有以窘乏告者量力助之家雖貧不苟取嘗授徒官署人有攜金以非義請者啟忞厲色拒之為制藝清真樸實試輒高等三薦鄉闈不售卒以明經終贛縣鄧自軒先生學宗程朱素與友善命諸子師事之昌圖

華國光國各有成就以品行文章著聲新城魯絜非表其墓曰先生篤於倫理仁於三族慎於取與蓋紀實也瑞金羅台山並為誌銘

### 段聖恭

段聖恭字履安號肅堂車頭石溪壩人幼肄業家塾父貿易一日雞鳴過之枕上聞父聲蹶然曰吾父方奔走不暇奈何安寢也遂起讀書夜常不寢年二十六補弟子員乾隆壬午舉於鄉事父母先意承志曲盡其道待兄弟友愛有過微言婉諭俟其自改旣析產兄弟窘甚所得館穀輒分給之弟聖术早逝妻矢

志守節為立嗣以主其祀歲荒族有不能舉火者給以錢米性廉介臨財不苟取族人有爭嘗賄求左袒聖恭辭曰吾豈可以利動者耶每燕處正襟危坐如見大賓人多敬憚年五十卒

### 劉定芝

劉定芝字鳳三西一坊人九歲失怙事母孝謹雖就外傅必日歸定省母歿春秋設奠泣曰祭而豐不如養之薄也兄弟四人伯叔早逝與仲兄怡怡一堂事無鉅細必請命而後行祖祠祭產薄甚經營數載蒸嘗有所出率宗人修族譜不辭勞瘁族有不平事秉

公排釋強悍亦為懾服弱冠補弟子員旋食餼屢困場屋晚乃貢成均選廣豐縣訓導邑人士沐其教育致仕歸作為詩歌贈之著有春秋撮要

### 易開暢

易開暢字怡軒東一坊人十一歲而孤母課之嚴開暢力學無間寒暑歲丁酉受知督學蔣公充拔貢生中乾隆己亥科舉人邑令聘主雩陽書院講席十餘年課文不倦四方從遊者多所成就事母孝謹兄早卒嫂氏矢志守節無子甫一子即以繼兄後并為理家政嫂氏以慰親族有不能舉祭者捐囊相助入

## 雩都縣志

### 卷之十

質行

八十五

咸得展其孝思屢試春官不第截取知縣不就年七十餘選南昌縣教諭勤於課士甫一年乞休而歸

### 劉洸

劉洸字照乘西一坊人少補諸生餼於庠晚貢成均性鯁直嫉惡如仇時邑有奸隸魚肉鄉里冒濫衣冠人多趨之洸獨屢訴之上臺以褫其氣隸誘以賄洸弗受攻之愈甚隸卒死於路洸年八十邑人士顏其堂曰不疚不回

### 譚捷斌

譚捷斌字文淵號怡堂澄江人自少力學沉潛經史

與弟源互相切劘補弟子員既授州同職天性篤實侍雙親不離左右昆弟怡怡一堂從無閒言治家一遵朱子格言家素封而好施與鄉里德之大學士戴公衢亨誌其墓比之宋之連舜賓

### 譚廷珍

譚廷珍字樹滋號輝山澄江人性篤摯事父母得其懽心既歿每祭祀輒泫然流涕曰安得如膝下承歡之日也失怙時庶弟金誥年方十三廷珍友愛備至提携成立俾遂顯揚後金誥以己職 貤封如其官

### 譚明蘇

## 零都縣志

### 卷之十

質行

八十六

譚明蘇字右坡恩貢生澄江人進士譚源子少失恃哀毀骨立積憂成疾歷數年始瘳事繼母愉色婉容未嘗一忤其意母稍不悅輒惶恐而跪母愠解乃起父歿任家政事無鉅細必稟命於母而後行族黨稱其孝性儉樸遇人急難輒解囊相贈無吝色為制藝矩矱先民屢困場屋與其兄明芬刻有荆樹堂合稿

### 李起翀

李起羽中字奮霄號立雲舉人聖裁子固院人天資聰敏博覽羣書為文超邁拔俗弱冠補弟子員試輒高等嘉慶庚申捷秋闈戊辰謁選饒州餘干縣訓導在

任六年振興文教餘千人稱之曰名孝廉晚歸設教里門所就多知名士生平不為利回不為威怵人咸服其直諒道光癸未分纂縣志

張文覲

張文覲字兼揚北鄉興仁村人沉酣經史制藝一尚清真英年食餼屢困場屋晚貢明經性剛直不苟嘖笑人敬憚之遇里黨有爭端輒竭力排解靡不悅從士林中不數數覲也

劉名謙

劉名謙字六吉號益亭西一坊人歲貢建次子庭訓

零都縣志

卷之十

質行

八十七

綦嚴力學礪行少補諸生屢試高等食餼素豪於飲兄弟怡怡一堂嘗樽酒言歡講論經史必至爭辨瀾翻而後已旋得胃氣疾遂淡意名場晚乃需次貢成均性耿介廉隅自飭非義之財一介不取座間常書一息尚存此志不容少懈十手所指吾心安可自欺之句其教人先品行而後文藝非公不至宰室宰欽其品學舉鄉飲正賓道光癸未分修縣志

劉名隨

劉名隨字協中號皆菴西一坊人歲貢建三子幼穎敏甫成童學為文出語驚其長老稱為千里駒期以

遠到年十九補諸生善詩工書中嘉慶丁卯副榜己卯房官張公景呈薦擬魁因未得三場卷遂棄置人皆為之扼腕且才識過人遇事有胆略時當道有辱士者直以理折於庭氣始得伸頻年主雩陽書院講席道光癸未分纂縣志工半而卒選永甯教諭士類惜之

劉一峰

劉一峰字志周銀坑人性穎悟嗜學弱冠補弟子員旋食餼屢赴鄉闈不遇晚貢明經設教鄉里主講雩陽書院數年誨人不倦後學多荷栽培道光癸卯科

雩都縣志

卷之十

質行

八十八

恩賞舉人生平婉容愉色善氣迎人不趨勢利品學兼優三舉鄉飲正賓洵謙謙君子也

何戴仁

何戴仁字曙峰號耐園晚號曉凡北鄉青塘人刻苦力學尤工書法英年食餼道光庚子舉於鄉兩試春官不第遂絕意仕進主雩陽書院講席楷模多士性耿直遇非輒斥族鄰有爭鬪賴以排解者數十年無訟獄事又精岐黃術求醫輒效如修文廟書院考棚志書諸義舉其倡勸之力居多并作記以垂久遠

曾鴻旦

曾鴻旦字式猷號東園固院人天資穎異好學不倦為文卓犖不羣試輒高等屢躋棘圍以明經老行已素秉剛直其教授生徒館規嚴蕭貧士多荷栽培心感者衆卒儒學甘公逢年銘其墓曰學有根柢行無瑕疵其生平已於此想見矣

### 朱鯤化

朱鯤化字鵬南邑庠生西鄉羅江人秉質英敏制行端方家貧教讀歷五十餘年循循善誘昕夕不懈其培植子姪輩遊庠食餼貢明經者八人及門亦共荷甄陶多所成就壽八十餘晚節尤堅綽有先正遺風

## 零都縣志

### 卷之十

質行

八十九

洵為士林模楷

### 林及鋒

林及鋒邑庠生鄉飲介賓西鄉羅江人居心謹厚制行端嚴尤沉潛好學終身不倦栽培子姪多所成就為里黨所咸欽云

### 蕭榮芳

蕭榮芳字紉蘭北鄉寒信峽人性嗜學手不釋卷為文矩矱先民中年食餼為人崇樸黜華廉而且直雖家徒壁立一以清節自持治家嚴約束無嘻嗃風鄉鄰有爭排解不憚唇舌至今里黨猶頌其德

義行

明

陳伯恭

陳伯恭竹溪人正統庚申出穀七百斛賑饑景泰壬申復輸穀二千八百斛以實倉廩奏聞 旌表

蕭立道

蕭立道西一坊人正統庚申歲饑出粟助賑有司上請授以冠帶邑建學宮捐屋基為門路廣數丈深十八丈每歲丁祭頒胙給豕首於其家至今弗替

李德本

雩都縣志

卷之十

義行

九十

李德本西一坊人景泰間輸粟二千石賑饑奏聞 旌表

李資

李資東二坊人天順戊寅輸粟一千四百石賑饑奏聞 旌表

劉汝德

劉汝德西一坊人宏治間輸粟一千石賑饑奏聞 旌表

葛昌信

葛昌信葛垵人正德初江右游饑捐粟一千六百五

十石賑濟如是者三載當事臚其事以上聞 旌表  
義民建坊授以頂帶至今坊基猶存

李思顏

李思顏西一坊人萬厯間奉按院葉允盛方大美吳  
達可布政使陳尚伊嘉其善行檄縣旌獎

王熠

王熠東一坊人萬厯間疊奉按院旌為善人

袁宗

袁宗唐村里人萬厯間奉按院王萬象檄縣旌為善  
人

零都縣志

卷之十

義行

九十一

國朝

易文濤

易文濤南關廂人順治丁酉奉按院笄重光旌為善  
人

吳翀

吳翀東一坊人康熙間捐修東門外紫陽觀前石堤  
費銀數百兩雍正辛亥改建學宮捐銀五百兩凡合  
婚之已離斂死之無棺者皆不可勝數邑人義之

陳有琅

陳有琅羅家渡人康熙己丑以貨油自郡歸於二馬

頭拾金一囊同伴梁子平迫之登舟故停宿客店候失金者還之人誦其義

蕭良璋

蕭良璋字穎特半涇人父文輝雄偉有大略三藩之變從征有功授守備職未幾卒穎特幼孤事孀居母曾氏四十餘年孝敬不衰少習舉業久困棘闈思繼父志有所建立乃納粟奏名然未膺民社惟於鄉里好善樂施鼓舞士類雍正庚戌捐銀二百兩倡修文廟乾隆甲子又捐租一百零四石七斗為文武兩庠歲科試高等者花紅及鄉試卷資每逢歲歉穀昂減

零都縣志

卷之十

義行

九十二

值以糶大荒更煮粥賑飢上憲各賜匾旌獎至今士林引重鄉里頌德

邱懋仁

邱懋仁東一坊人雍正辛亥建學捐銀三百兩弟懋壘捐二百兩邑人義之

蕭必箕

蕭必箕字次梁西一坊人雍正庚戌重修學宮必箕盡心督理矢勤矢慎少時田賊為患糾集鄉勇禦之田賊以息乾隆初年舉鄉飲僎賓年九十三卒

吳標

吳標東一坊人乾隆九年獨力捐銀數百兩修造唐村里長坑口廻瀾文峰塔邑中神廟橋路有圯者並慷慨捐修

易方窓

易方窓字維岳東二坊人乾隆二十二年奉設社倉捐穀一百石

陳元龍

陳元龍馬嶺人乾隆二十二年奉設社倉捐穀三百石見義勇為綽有鄰里相周之風

葛永勝

葛永勝葛垵人義民昌信裔孫家不甚饒而樂善好施乾隆二十二年奉設社倉以備儲蓄勝捐穀一百石以為鄉閭倡衆皆踴躍樂輸勝之勇於為義與祖先後濟美

溫立常

溫立常字克憲虎井人以勤儉立業宗族鄉黨有以急難告者竭力周之無少吝康熙甲申辛丑饑饉洊臻立常發穀賑之雍正戊申己酉歲凶亦然人或告貸貧不能償輒戒其子孫毋迫索晚年舉鄉飲大賓五世一堂僉以為積善之報云

溫揚

溫揚虎井人立常子慷慨好施有父風歲歉獨捐錢米賑濟族黨賴以舉火者數十百家死而不能葬者輒施棺殮助築埋俾無暴露他如捐田建閣捐基建祠毫無吝色縣府藩憲各旌以匾

黃名哲

黃名哲字鑑亭西一坊人素行端方舉鄉飲大賓嘉慶庚午創建試院名哲竭力經營凡閱三載費不敷即捐金一千四百有奇告厥成功士類頌之族建義倉書田皆捐金相助又捐租四十石為祖祭產歷任

零都縣志

卷之十

義行

九十四

邑侯四贈額以旌其行

溫鼎

溫鼎字廷賜虎井人幼失怙事母孝謹不離左右母病侍湯藥不少懈母怒輒跪而受責怒亦解歲饑減價平糶族有貧甚欲賣其子媳者鼎解囊授之其不能應試與不能葬娶者並贈以貲大母家貧甚歲量給粟凡五十餘年後置田十畝為外祖醮祭費

溫昌錫

溫昌錫字朋百西一坊人族本軍籍漕運難支昌錫設法措理綽有餘貲邑侯張公湄勸立義倉捐穀五

百石

恩賞職銜從弟昌錦少孤視如同胞異母弟潤澤子家瑞教之甚嚴均補弟子員

管奕綱

管奕綱字宏振西一坊人監生家頗饒性情循勤不尚浮華而義舉無吝予命其子雲藻捐穀五百石為邑義倉

恩賞職銜又捐穀八十石為旌義倉西郊大佛寺年久將圯綱捐金數百兩修羅漢殿邑修志書書院并任其勞邑令黃濬贈以仁宇貽安匾

零都縣志

卷之十

義行

九十五

王家德

王家德字鴻才監生車頭人捐穀五百石為邑義倉恩賞職銜歲饑平糶以濟族人他如修義渡開溝洫施棺木建祠宇刻陰隲文皆慷慨為之

宋啟璿

宋啟璿字冠爵賴村人尊祖敬宗於縣城創建家廟獨力任之費用千金周貧恤困亦無吝色邑修城垣捐囊相助邑令徐培贈以好義急公匾

譚仁慎

譚仁慎字謹機號敏堂澄江人例授布政司理問銜

素性鯁直樂善好施道光間重修學宮捐百金以助  
邑立義倉捐穀五十石又捐奉濂溪書院膏房租一  
百餘石丙戌庚寅甲午歲饑米貴均發穀賑濟賴以  
活者數千人繼又倡建義倉為族善後計及修祠宇  
施藥餌扶危恤困鄉里德之

管遇春

管遇春字燦廷號東陸西一坊人以廩貢授教職委  
署樂安教諭家素封慷慨樂施咸豐三年癸丑捐修  
五門城樓四年修城捐銀四千二百兩六年夏被賊  
城陷助軍餉三千兩募勇克復七年冬髮逆圍城又

零都縣志

卷之十

義行

九十六

捐金招勇捍禦城陷陣亡生平雅意體恤寒儒欲捐  
文武入泮薪水時賊氛擾攘致未果行後其媳捐奉  
東南二鄉田租四百餘石以成翁志

蕭金錫

蕭金錫字文德州同銜東鄉長源人素性慷慨咸豐  
七年捐修縣署費三千餘金同治間厥弟廩生藜照  
朋修大成殿及縣署麗譙樓書院考棚共計費一千  
有奇

宋爾朝

宋爾朝職員賴村人道光三十年捐修大成殿計費

一千有奇又獨修賴村桃花壩石橋一座費數千金  
邑令潘毓瑞贈以聯云彼所謂豪傑之士也人以為  
難能而貴焉

### 陳宗岱

陳宗岱字似遊郭田人監生為人好義急公獨修東  
門外雙橋費金一千有奇素有意捐奉雩陽書院膏  
火事未成而逝其子孫遵其遺命奉城內店房九所  
值價一千餘金及修考棚甄石約值數百金

### 曾泰臨

曾泰臨字玉堂 誥贈奉政大夫北鄉坎田人性孝

## 雩都縣志

### 卷之十

義行

九十七

友事親色養無閒祭葬盡禮季弟德翼幼各爨手足  
情重析而復合創置膏腴百頃迄弟成立始均分之  
道光甲午歲大饑捐貲興役新開通衢於坎田水口  
并建石橋一座計費數百餘金行人便之是舉也旅  
客相忘而誰知力之普饑者賴濟而不居賑之名他  
如施茶修路建祠贍祭創開雞啼石水利皆慷慨為  
之鄉里至今猶頌其德

### 江明萼

江明萼耆民南鄉小溪人待人寬恕持己剛方治家  
嚴肅尤仗義疎財鄉鄰有爭訟輒婉言排解俾雪釋

冰消心感者多村中橋梁道路悉為倡修行人德之迄今猶嘖嘖人口云

### 葛薰亭

葛薰亭邑增生葛圯人生平好學礪行性喜施與嗣君四皆敦孝友勤耕讀怡怡如也迄捐館時凡有志未逮之事悉遺命後嗣母墜厥志諸嗣能繼父志慷慨為之咸豐辛亥捐穀百石倡起文武□培養人材又捐穀二百石立義倉以備歲饑癸丑贍田數十畝建六憐堂以給族中鰥寡孤獨及廢疾貧不能葬者悉以周之乙卯贍田以起祭產此皆公之遺命而諸

嗣克承先志者也至今孫曾林立衣冠濟美族黨之人僉曰善哉薰亭公穀貽孫子積善餘慶之報為不爽云

### 李九彩

李九彩字煥華鄉飲大賓貲贈奉政大夫長樂里珠村堡人生平持己質樸待人慷慨捐本族義倉以備凶荒修黄金石路以便行人凡族鄰春夏乏食者發穀以應其乏秋收後收本不取息周貧恤寡睦族和鄰義所當為者皆樂為之厥後喆嗣例貢生春臺克

承先志朋修大成殿武廟及書院考棚又捐建琵琶  
龍黃金石孝義亭贍田二十畝以施茶水合計捐費  
不下二千餘金悉遵遺命至今孫曾林立長孫飛熊  
授同知銜請二代封典次飛祥縣丞銜三飛鵬附貢  
生餘皆業儒衣冠濟楚人以為厚德所致云

補遺

管德松

管德松字盛軒號筠濤布政司理問銜西一坊人性  
勤樸喜施與如新祠宇奉祭產造祖墳立義倉設卷  
資宗族皆感其德既而家益起捐穀五百石為邑義

粵都縣志

卷之十

義行

九十九

倉襄修文廟大成門名宦鄉賢二祠遷武廟奉店基  
以寬廠門閭又捐修生佛寺羅漢殿翠竹樓此皆邑  
中義舉均不惜重貲而樂為之邑侯黃公濬為之記  
歷任四侯皆贈以匾額其子遇春亦饒有父風所以  
作述之善至今猶嘖嘖人口云

邑庠生鍾清傳

洪霖

鍾清字錫榮北鄉長樂里上寶人少讀書豁然有大志常以利濟天下為心道光丙申受知於學使許公補弟子員益篤志上進謂從此取青紫掇巍科可以展吾人之懷抱而為所欲為矣無何屢躓場屋夙志莫酬則又憬然曰聖賢施濟之道無間窮通吾不能自濟於天下獨不可濟於一鄉一邑乎由是周貧乏恤孤寡修祠宇助捐輸循其分之所為量其力之所能盡而略無吝色先是甲午大飢斗米千錢鄉中餓莩相枕藉因為捐穀數百石倡建義倉又勸族人

之饒裕者量力捐輸得若干石自是凶荒有備咸豐初粵匪據金陵土寇竊發爰集諸兄弟子姪謀築圍以防患越年工竣而寇至族鄰得其捍衛多所保全然尤慮湫隘不足以容衆也議並村為堡增築長圍乃議初定而疾大漸彌留之際遺囑二孤學瑛學琚繼成之費三千餘金云本里欄杆前二水合流為往來之要津舊有石橋易木為之歲久將圯議復建石橋二以利行人其一獨力捐修其一與數殷戶共捐之又獨建牛軛嶺及冷水坑口二處茶亭勸建本處塘灣背茶亭並施茶水既足以解行旅之渴煩又足

以避風雨合橋與亭所捐不下三四千金皆遺命也  
鄉人德之

義民王容光傳

洪霖

王顯照字容光北鄉長樂里暘溪人幼失怙先人遺產甚薄以勤儉成家至累巨萬性好施與生平多推解事歲飢則減價以濟貧人鄉鄰咸稱為長者尤厚於族衆族中有不能舉火者時時周給之又捐穀石倡建義倉出重貲剏築圍堡俾桑梓之地凶荒有備捍衛有資者皆積而能散之力也而且於近處李坑大逕口欄杆前捐修石橋以便往來又於同里黃泥

窩約同人勸建茶亭並置田畝施茶水以解渴煩行人德之今其長子耀祚為國子貢士次子耀禮為國子監生長孫光佳兄弟早歲入邑庠一家之中衣冠濟楚英才輩出人以為厚德之報云

例授州同給五品銜易桂林傳

洪霖  
邑人

易桂林字澤華東鄉固院人少孤貧事母以孝聞力  
田外閒服賈以供甘旨母老染沉疴輾轉床第則躬  
侍湯藥親為澣濯歷數十年如一日比卒號天搶地  
哀動閭里生平友愛兄弟怡怡如也處鄉鄰以慷慨  
聞饒裕後凡周貧急公成梁除道諸善舉皆極力為  
之尤練達多應變才族故軍籍漕運維艱桂林剔除  
其積弊措置有方嗣是漕艘轉運略無支絀道光間  
有吏胥魚肉鄉里執政為左袒諸紳士詣縣代白不  
得直至通詳請革累及七人桂林與焉彼時人人惴

零都縣志

卷之十

義行

百二

恐慮無貲財為伸理地桂林曰事無恐而財亦不足  
慮因慨然携貲偕七人赴郡伸雪事卒得白咸豐初  
粵逆擾鄰境衆心震懼因捐貲倡辦團練保衛桑梓  
事平上之當事給五品銜先是零俗多械鬪睚眦小  
故輒成大獄桂林遇事排解數語而渙然冰釋此其  
忠信明決足以服人至今稱道弗衰云

鄉飲大賓王演六傳

王際亨

王君演六鄉飲大賓為

際亨

族叔祖世居邑之車頭

素稱善理財好施與蓋吾鄉之善士也跡其生平勤慎質樸幼歲失怙席先人產業無幾翁乃卓然自立善繼而猶善創持籌握算億能屢中歷數十年經營擘畫田園廬舍倍蓰前人居然稱巨富焉吾觀世之好積財者每多鄙吝成風惟翁獨好善樂施凡事闕義舉輒慷慨無少吝如祀祖考則捐貲以立烝嘗賑荒歲則減價以濟宗族隆報賽則建廟宇以答神庥且造橋梁修道路如黃金寒信二峽等處行人皆

粵都縣志

卷之十

義行

又百二

便遐邇咸稱種種善行雖費金數千坦然為之無德色無驕容道光丁酉邑侯宋公耳其善行堪嘉品望攸隆舉以鄉飲大賓書曰作善降之百祥宜其哲嗣挺生三槐競秀長樹槐例授分司銜次學曾名標庠序三國瑞望重園橋孫曾繞膝濟美一堂益信天之福善與翁之食報於天者未有艾也

附貢生蕭端傳

譚 諭

蕭端字品方號楷園附貢生西一坊人少賴異性孝友弱冠補弟子員讀書深明大義恒存利濟之心及壯歲高堂垂白家務日繁不忍以累親心因棄舉子業持理家政孝事父母友于昆季延名師勤課子姪親宗族和睦鄉鄰為人慷慨樂善好義既而家益起自始有而富有凡邑中義舉靡不倡首竭力慷慨為之道光間建書院修邑志新學宮悉捐重貲無少吝族戚鄉鄰有困乏者咸賙恤之邑侯黃公濬旌以宅仁處義匾額遐邇皆知蕭君樂善好義人也君生喆

粵都縣志

卷之十

義行

百三

嗣三長名誥為國子監生次名謨由邑庠授州同銜三名詔由增生授布政司理問銜皆卓然人中之傑當時擬以河東三鳳且秉庭訓善繼述如重修文武廟改建文昌宮修築城垣咸豐間粵逆陷城捐助軍餉募勇克復此皆克承先志以繼好義之舉也厥後孫曾林立詩書繼世誥子敏道光丙午舉於鄉斐己酉拔貢其餘列膠庠者十選明經者三授仕職者三衣冠濟楚英英蔚起論者以為樂善好義之報為不爽云

寓賢志

使節

漢

灌嬰高帝五年以使節略定江南城豫章置雩都縣築壘於雩山之陽時南越趙佗寇境嬰將兵擊退雩人即其駐壘處立廟祀之名曰昌文侯廟今廢

宋

周敦頤字茂叔道州人慶曆甲申為南安司理後二年丙戌興國知縣程公珦令二子見先生所謂濂洛授受此其時也嘉祐辛丑先生以國子博士通

雩都縣志

卷之十

寓賢

百四

判虔州又二年癸卯行縣至雩都邀餘杭錢建侯四明沈希顏遊羅田巖正月七日賦詩刻石而歸巖有濂溪閣祀先生兼祀二程於此

岳飛字鵬舉浙江湯陰人紹興三年以武安軍承宣使平嶺表召赴行在時吉州盜彭友虔州盜陳禺連兵數十萬分據巢穴帝命飛平之至雩築三砦嘗遊羅田巖訪黃龍禪師舊蹟題詩於壁

文天祥字宋瑞廬陵人景炎元年端宗登極拜右丞相樞密使都督諸路軍馬二年與元人戰於雩都大捷嘗遊羅田巖大書四言集句刻於石壁

元

王榮忠字君直湖廣岳州人至正壬辰任贛州路通判賊據甯都榮忠守雩都與賊戰凡三捷明年春賊陷會昌榮忠又分守雩都以援之陳至言有分府王公祠記見藝文

明

王守仁字伯安餘姚人正德十二年丁丑平漳寇班師過雩父老趨迎時積雨初晴公賦詩慰勞之薛甲字畏齋江陰人嘉靖十九年庚子以分巡副使采風至雩因同羅念菴黃洛村講學羅田巖有詩

雩都縣志

卷之十

寓賢

百五

唱和

陳士奇字平人福建漳州人天啟乙丑進士崇禎庚辰分巡嶺北清介絕俗喜談兵時天下多事公以廓清為己任行縣至雩禁絕供帳召集士民於明倫堂畫略尊卑之文誨諭慤慤如家人父子焉楊廷麟字伯祥清江人崇禎辛未進士授翰林院編修旋罷及明勢就危廷麟因慕文山疊山之為人遂自號兼山乙酉贛圍急隻身獨入與萬元吉協謀拒守備極勞瘁嘗調兵至雩過青塘作詩二章其蒿目時艱徘徊國難忠臣憂勞之心悠然見乎

言外城陷之日沒於贛之青水塘

國朝

蘇峻大順天人以貢生任贛推官順治戊子雩都渠魁曾斌羅聚奎等嘯聚禾豐山謀以二月窺城劉虔撫武元發兵勦之偵者道聞訛言城中士民猶蓄髮統兵諸將議先屠城後擊賊峻大適以他事過雩雩民焚香城上自愬無辜峻太兼程抵郡白其事力保雩民不反武元然之遣飛騎諭諸將毋妄殺良民雩人得慶更生因為祠以祀

哲爾肯滿州人任南贛總兵康熙十五年閩逆盤踞

雩都縣志

卷之十

寓賢

百六

會昌雩都爾肯大破之十六年韓大任據吉安自汾坑渡河急攻鷓鴣老新二寨爾肯力戰陣斬五百餘級

游寓

宋

唐稷字堯弼會昌人其祖過雩都奇硯岡山水結廬其間稷稍長偶歸故鄉鄙其氣習拂袖歸硯岡一意力學政和二年登乙科授宜黃丞歷知監利縣宣和五年授湖州叅軍後除樞密編修補荆湖南路安撫司隆興元年卒著有硯岡集五十二卷

明

解縉字大紳吉水人洪武二十八年寓雩作重修福田明覺寺生佛道場記并題郭僉憲之門两道風霜額

羅洪先字念菴吉水人嘉靖十九年訪邑人黃宏綱於羅田巖時副使薛甲行縣偕諸生集巖中論學多所題記復遊需巖拜王翼道先生祠留詩刻石羅汝芳字近溪嘉靖間嘗遊羅田巖有詩題咏歐陽德字南野泰和人遊羅田巖有詩

張鰲南昌人嘉靖間訪學於邑人黃宏綱何廷仁因

雩都縣志

卷之十

寓賢

百七

謁羅巖濂溪祠同刻詩石上

劉曰佺字勿仙劉曰价字維人贛縣人避地需巖劉同升字孝則吉水人遊羅巖有詩

國朝

魏禧字冰叔一字叔子甯都人明徵士天民子隱居金精山易堂著左傳經世入

國朝改裝遊江淮吳越間縱交天下士朱竹垞程穆倩輩皆與之遊嘗避亂寓雩久之有題詠